

2 REIS

Hawě unāmati hātxaki

Na una miyui betsa bekesh betsarā, haska Israelī enabū txakabuwakī heneama pikukubainibu inū eskarabesbū pepawanibukiri 10 shukuabu nortekiria inū 2 shukuabu sulkiria Deusū hatu yunua nawa Assriabū ha 10bu atxishū hatu itxakawanibuki, ana hau habu payamanūbunā.

Hanushū Judá enabu unanuma pe hiweama txakaburiaibū hatū txakabuwē taeshū Deusū hatu yunua Babilônia anuabū hatu atxitā iyunibukiaki. Haria 70 ano kaitiā hatū mai pakea anu Deusū ana hatu txītūmanikiaki.

Ha habu ikirā, Israelī shenipabu itxaparā, Judá enabu besti inibukiaki.

Na una miyui kenenibu 1 Reisbe txitxia betsa kenenibuki, ha ano 500 Cristo huriamatianā.

Acazias haskatā mawanikiaki, na hātxarā

1 ¹Acabe ma mawaimakē hawē bake Acazias shanē ibuaya Moabe nawabu Israelī enabuki sinataibū ²hanua shaba betsatiā Samaria anu Acazias hawē hiwe hawērua anu manaūri tapa betsa anua hanu niwe hikiti shui uībaūti anu tsaua hawa shināma kauani māi tī iki txakamana txakayama isī tenei dakashū hātxa bunikabu hatu kena beabu hatu yunukī: “Ecrom anushū hatū mekenika yushibu Baal-Zebube ē txakamana ē isī teneai ē shushaimēkaī, ea yukashūtākāwē”, hatu wa buaibū, ³habiatīāri Senhor Deusū nai tsumā Tisbé anu hiwemis Elias yuikī: “Samaria anua hātxa bunikabu shanē ibuhaira Acaziasī ma hatu yunua bekanikiki. Hatuki nukutāwē. Hatuki nukutā hatu yukatāwē: ‘Israelī enabu mekenika Deus hayamamē? ha mae Ecrom anu nawabū yushibu Baal-Zebube anu mā yuka ishuī kairā? ⁴Mā haskabiakiranaya Senhor Deusū ea yuikī: Eska Acaziaskiri yuikiki: Ha mī dakati anua mī isī teneairā, habianua ana beniamā mī mawaii, mia waikiki’, akī ea yuishūtāwē”, aka

haska Senhor Deusū nai tsumā yunua Elias ka hatuki nukushū haska Senhor Deusū yuishu hatu yuia ⁵hawē hātxa nīkatā hatū shanē ibu anu hawaira txītūbaī ha bebū mapuabu Acaziasī hatu yukakī:

—Haskatã mã hawaira txítũkiranai?— hatu wa

⁶habũ kemakĩ yuikĩ:

—Nũ kai bebũ huni betsa nukuki nukushũ nuku yuikĩ: “Harishũ shanẽ ibũ matu yunushu anu ana txítũribaikãwẽ. Haska Senhor Deusũ ea yuishu matũ shanẽ ibu yuiritãkãwẽ: ‘Israelĩ enabu mekenika Deus hayamawẽ taeshũ Ecom anu nawabũ yushibu Baal-Zebube anu hau mũ tsumabũ mia yukashunũbũ mũ hatu yunushuwẽ taea mũ dakati anua beniamã mũ mawaii’, akĩ Senhor Deusũ eska yuikiki”, akĩ nuku yuiawẽ taea nũ txítũshuki— akabu

⁷shanẽ ibuhaira Acaziasĩ hatu yukakĩ:

—Ha huni tashnikirã matuki nukushũ haska hãtxa matu yuishurã, haskara ishũmẽ?— hatu wa

⁸habũ kemakĩ yuikĩ:

—Ha huninã, txashuwã bitxi tari inũ bitxi nanesheketi sawea nũ uĩshuki— akabu

shanẽ ibu Acaziasĩ anãkĩ hatu yuikĩ:

—Harã, Tisbé anu hiwemis Elias matuki nukushuki— hatu watã ⁹hanua Elias uikãshu anu hau butanũbũ Capitão betsabe 50 detenamenikabu yunua bui mati hanu Elias tsaua anu kemashũ Capitãonẽ yuikĩ:

—Deusũ huniĩ, shanẽ ibuhairatũ mia kenaikiki. Bututã shanẽ ibu anu ebe kayuwe— aka

¹⁰Eliasĩ kemakĩ yuikĩ:

—Ë Deusũ hãtxa yuishunikarã, na habiatiã mã uiaĩ. Nai anua txi here hi ibirã matu kuakĩ yamawaikiki— akaya

hawaira nai anua hatuki txi here hi ibirã hatu kuakĩ yamawaya

¹¹hatu haska washu huni betsã uĩbaĩ shanẽ ibu Acazias banabima hau habũri itanũbũ Capitão betsari 50 detenamenikabube shanẽ ibũ hatu yunuria bui kemashũ Capitãonẽ yuikĩ:

—Deusũ huniĩ, shanẽ ibuhairatũ mia kenaikiki. Manama hawaira bututã ebe kayuwe— aka

¹²Eliasĩ kemakĩ yuikĩ:

—Ë Deusũ hãtxa yuishunikarã, na habiatiã mã uiaĩ. Nai anua txi here hi ibirã matu kuakĩ yamawaikiki— akaya

hawaira nai anua hatuki txi here hi ibirã hatu kuakĩ yamawariaya

¹³hatu haska washu huni betsã ana uĩbaĩ shanẽ ibu banabima hau habũri itanũbũ Capitão betsa 50 detenamenikabube shanẽ ibũ hatu yunuria bui ha mati anu kema hawa yuiama hawẽ 50 detenamenikabu hatu bashitã Elias tsaua anu mapekekaĩ ha bebũ dãti ishũ ea akĩ:

—Deusũ huniĩ, nukuwẽ nuiwe. Ë hiwea inũ na mũ 50 tsumabu hiwea shinaĩ nukuwẽ nuiwe. ¹⁴Habu dukũ nai anua txi here hi ibiranaiwẽ Capitão dabe hatũ detenamenikabube menui yamakãshuwẽ taeshũ mũ merabewati ã mia ea akaii, hau mũ nukuri haska wayamanunã— aka

¹⁵hanushū Senhor Deusū nai tsuma kushipatū Elias yunukī:

—Dateama habe kashū uītāwē— aka

Elias benitā Capitāobe butukaini shanē ibuhaira Acazias uī kashū
¹⁶yuikī:

—Senhor Deusū eska mia yuikiki. E Crom anu nawabū yushibu Baal-Zebube anu hau mia yukashūtanūbū habū mī hātxa yuinikabu mī hatu yunukī Israelī enabu mekenika Deus tsuā mia yukashūtirimakē mī haska shināshinawē taea mī dakati anua ana beniamā txanima mī mawaii— atā Elias kakē

¹⁷haska Senhor Deusū Elias yuimashina keskai Acazias mawanikiaki. Haskaitiā Judá enabu yunui Josafā huni bake Jeorāo shanē ibui 2 ano hatu ishuāyā hanua ha Acazias hawa huni bake hayamakē Acazias shātukū hawē betsa Jeorāo Israelī enabū shanē ibuhairai taenikiaki.

¹⁸Israelī enabu shanē ibuhairabu ikubainikiri una betsa merā hatuki kenemisbu hawē daya betsa betsapa Acazias hiweshū akubainikiri hakiri kenenibu hayaki.

Mawama hawē yura hirabiya Senhor Deusū

Elias nai anu aininikiaki, na hātstarā

2 ¹Niwe kushipahaira shubi shubi imakī nai anu Senhor Deusū Elias ainibaishanai kemaya Gilgal anua Elias inū Eliseu kaīkaīkī ²Eliasi Eliseu yuikī:

—Betel anu Senhor Deusū ea hari yunuaiwē taea na habianu bashikuyuwe— aka

hakia Eliseū kemakī yuikī:

—Senhor Deus hiwea inū mī hiweawē taeshū ē mia yubaii. Mimesti mī kai ē mia heneamaki— aka

hanua ha dabe Betel anu buaibū ³hanua Betel anua Deusū hātxa yuishunikabu betsabu hiweabu kaībaini Eliseuki nukushū yuikī:

—Senhor Deusū mī huni yusinā mia ikis mebiainā, mī ma unai?— akabu

hatu kemakī yuikī:

—Haa. Ma habiaska ē unaii. Hakia matunā, hawa hatu yuiyamakāwē— hatu wa

⁴hanushū Eliasi Eliseu ana yuikī:

—Jericó anu Senhor Deusū ea hari yunuaiwē taea na habianu bashikuyuwe— aka

hawa nīkama Eliseū kemakī ana yuikī:

—Senhor Deus hiwea inū mī hiweawē taeshū ē mia yubaii. Mimesti mī kai ē mia heneamaki— atā Jericó anu ha dabe ana buaibū

⁵hanua Jericó anua Deusū hātxa yuishunikabu betsabu hiweabu kaībaini Eliseuki nukushū yuikī:

—Senhor Deusū mĩ huni yusinã mia ikis mebiainã, mĩ ma unai?— akabu

Eliseū hatu kemakĩ yuikĩ:

—Haa. Ma habiaska ã unaiĩ. Hakia matunã, hawa hatu yuiyamakãwẽ— hatu wa

⁶hanushū Eliasĩ Eliseu ana yuikĩ:

—Hene Jordão anu ukeri Senhor Deusū hauri ea yunuaiwẽ taea na habianu bashikuyuwe— aka

hakia Eliseū ana kemakĩ yuikĩ:

—Senhor Deus hiwea inū mĩ hiweawẽ taeshū ã mia yubaii. Mimesti mĩ kai ã mia heneamaki— aka

hanua ha dabe Hene Jordão anu buaibū 750 Deusū hãtxa yuishunikabū hatu txibaĩ hatu itxū buaibū ha dabe habu bebū benãta mapushū uiaĩbū Hene Jordão kesha anu Elias inū Eliseu nitã ⁸hanushū hawẽ yabukuti Eliasĩ pekatã sebikĩ txaipa watã hawẽ hene bekusha, hene dami hamebi tuash iki niti ikẽ ha dabe mai tsusĩ anu pukebaini ⁹kesha betsauro kapukeshū Eliasĩ Eliseu yuikĩ:

—Ë mia henebaĩriama haska mĩ betxipaiaĩ ã mia ashūturu ea yukawe— aka

Eliseū kemakĩ:

—Senhor Deusū mia merabewakĩ hawẽ yushĩ kushipa mia atximakubaĩmis keska habias kushipa dabeki hau ea inākubaĩshanū haska ã mia ea akaiĩ— aka

¹⁰Eliasĩ shinãtã yuikĩ:

—Hawama ea yukama itimaska mĩ ea yukaii. Ë mia henebainai mĩ ea uiãyã haska mĩ yukashu Senhor Deusū mia merabewakĩ dabeki keska mia amakubaĩshanikiki. Hakia mia henebaini ã kaimakẽ haska mĩ ea yukashu Senhor Deusū mia inãma ishanikiki— aka

¹¹bai tanabaini habe hãtxa dabekubainaibū hawaira hawẽ tarãbaĩti txi inū cavalo dabeya txiya tashnibirãkĩ hatu pashkarabebaini niwe kushipa shubi shubi ibaĩkĩ Elias nai anu ainibainaya ¹²haskakainai Eliseū uĩkĩ hui kushipawẽ kenakĩ:

—Epaã, epaã, Israelĩ enabu mekenika cavalõ tarãbaĩti inū hawẽ katsaubãiti cavalo detenamenikabu itxapabu ã uiaĩĩ— atã

hanua Elias haska kainima ana txitũkiranai uiãma inikiaki.

Elias keskariai Deusū hãtxa yuishunika kushipa Eliseu iriakũkainikiaki, na hãtxarã

Eliseū Elias ana uĩtirumawẽ taea nuihairakĩ hawẽ tari ushnikĩ namakis dis atã ¹³hanushū Eliasĩ yabukuti manaũri inakaĩkĩ tĩ abaina bitã tsumabaini Hene Jordão anu txitũkirã hene kesha nishū ¹⁴ha kushipa hayawẽ Eliasĩ yabukutiwẽ hene bekushtã hamebi yuka ikĩ yuikĩ:

“Eliasĩ mekenika Senhor Deusrã, hanimẽ?” ikaya hene dami hamebi tuash iki niti ikẽ Eliseu ana pukebainaya ¹⁵kesha betsauri Deusũ hãtxa yuishunikabu Jericó anu hiweabu haska hene tuash atã pukebirani Eliseu huai uĩkĩ yuikĩ: “Uĩkãwẽ! Eliasĩ yushĩ Eliseu mamaki ma butuaki”, iake iaketã

haki nukunũ ika bui Eliseu bebũ mã di iki beutã ¹⁶habu Deusũ hãtxa yuishunika betsã yuikĩ:

—Uĩwẽ! Mĩ dayaru nukuburã, 50 huni kushipabu nũ hayaki. Senhor Deusũ Yushinẽ Elias ainibiabaĩkĩ mati betsã anu henebaina kasmai, pashku napaku anu pakebainamẽkaĩ. Mĩ huni yusinã hau benatanũbũ betsabu hatu yunupa?— akabu

hakia Eliseũ hatu yuikĩ:

—Haskamahairaki. Hatu yunuyamakãwẽ— hatu wa

¹⁷haska hatu yuibia hawa nĩkama hawẽtsaĩs yukakubaĩkĩ bikawabu atimas hatũ hãtxa ana nĩkakatsi ikama hatu yunukĩ:

—Peki. Hamẽ haskatanũ ika mã ikanimẽkaĩ, hatu yunukãwẽ— hatu wa 50 hunibu hatu yunuabu bushũ Eliasĩ yura betxinũ ika shaba dabe inũ besti benabiabaunabu hawa betxiabuma ¹⁸Jericó anu Eliseu bashikushina anu txitũbirani haki nukuabu Eliseũ hatu yuikĩ:

—Eanã, bebũkiri ẽ matu yuiama ishiãmẽ? mã buyamanũbunã— hatu wanikiaki.

**Jericó maewã anu ãpash txakabu txatxa habai Eliseũ hatu
pewakĩ hatu hawama washunikiaki, na hãtxarã**

¹⁹Jericó anu hiweabũ Eliseu yuikĩ:

—Haska na mae anu nũ hiwea mã uiaĩnã, hiwea peki. Haskabia nukũ ãpash txatxa habai txakabuki. ãpash txakabuwẽ taea nukũ yunu benebiai hawẽ bimi mawaira ismaki, mai txakabuwẽ taearã. Haska watã mã nuku merabewatirumẽ?— akabu,

²⁰Eliseũ hatu kemakĩ yuikĩ:

—Kẽtxa benaki sal mata ea beshũkãwẽ— hatu wa, beshũ inãbu ²¹ãpash txatxa anu kashũ Eliseũ sal ha ãpash merã di akĩ yuikĩ:

—Eska Senhor Deusũ yuikiki: “Ana matu tenãma inũ matũ bai anu hau yunu bimi ana txakabuyamashanũ matũ ãpash pewakĩ ẽ matu hawama washũshuki”, akĩ Senhor Deusũ matu ashũshuki— hatu wa

²²haska Eliseũ hatu yuima keska Jericó anua hatũ ãpash pehaira ikũkainikiaki.

Suném anu aĩbu hiwea Eliseũ merabewanikiaki, na hãtxarã

4 ⁸Eliseu hawẽtsaĩs mae tibi anu katã katãmis shaba betsatiã mae betsã Suném anu daĩbainaya hau hatubetã piyunũ aĩbu pepa enaya mabuyatũ kena txakayamamiswẽ taeshũ Eliseũ hatubetã pibainimashũ

txipu hawětsaís hawě mae daíbaíkí hawě hiwe anu hikishū hatubetã pikubaímiswě ⁹taeshū aíbū hawě bene yuikí:

—Baa, ea nīkawe. Ha huni hawětsaís hukirã hukirani nukuki bamisrã, Deusū hãtxa yuishunika meribiki. Ē unaií. ¹⁰Nukū hiwe sapa sheni mamaki hawě dītu betsa hawena washunãwě. Dītu washūtã hawě dakati inū, hawě tapu inū, hawě tsauti inū, hawě bī nū pewashūtiruki. Hanu nukuki ana bai hua hanu ushakūkaítiruki— aka hawě ainí hãtxa txibãkí haska yuia hau ashunūbū hawě benē hawě dayarubu hatu yunua hawaira ashūshinabū

¹¹betsatiã hua hanu ushakí Eliseū ¹²hawě merabewanika Geazi yuikí:

—Ha aību Suném anua ea yuishūtãwě— aka

kenashūtana Eliseu bebū nikē hawě merabewanika yunukí:

¹³—Nukuwě nuikí nuku duahairawamis nū hawa ashūkí merabewatirumēkaí, yukawe, merabewai Samaria shanē ibuhairabe hakiri nū hãtxashūtiru inū detenamenikabu shanē ibube hakiri nū hãtxashūtirumēkainã— aka

habias hãtxa Eliseū hawě merabewanikã aību yuishuna aíbū kemakí yuikí:

—Nenu enabube hiwea ē hawa hatube txakabumaki— abaini kaya

¹⁴Eliseū hawě merabewanika ana yukakí:

—Ha aību haskakēkaí, nū hawa ashūtirumē?— aka

hawě merabewanika Geazí kemakí yuikí:

—Ē unãmaki. Hakia ha aību hawa bakeuma inū hawě bene ma mestebuki— aka

¹⁵Eliseū ana yunukí:

—Ana kenatãwě— aka

kashū kenatana aību hua beputi kesha nikē ¹⁶Eliseū aību yuikí:

—Na ano betsa huaikí na habia usheki huni bake kaítã mĩ

ikushanaii— akaya

datekí kemakí yuikí:

—Ē shanē ibuū, mĩ Deusū huniwě taea eki paranayamawe, mĩ tsumakirirã— aka

¹⁷hakia haska Eliseū yuikí banabimabainima ma bake bima tuyakē ano betsaki huni bake kaíma ¹⁸shaba betsatiã bai anushū shekiwã trigo tsekaiibu anu ha bake ewai keyataparíamabia hawě epa uí ka ¹⁹harishū bakeishtã hawě epa yuikí:

—Arii, arii! Ē bushka ē isíhairaii!— ikai

hanushū hawě epã hawě tsuma betsa yuikí:

—Hawě ewa anu ea iyushūtãwě!— aka

²⁰bakebaíkí hawě ewa anu iyua hawě ewa shãtxuramea tsaua isí tenei pikuhairatã bari mananãbi bakeishta mawaya ²¹Deusū hãtxa yuishunikatū dītu anu bakebaí manaūri iyushū hawě dakati anu hanatã

kaïkaïkĩ hawē beputi bepubaini ²²datehairakaĩ hawē bene kena hawaira hua yuikĩ:

—Deusũ hãtxa yuishunika anu ã hawaira kushikaĩkatsis ikai haratura nukũ dayaru betsabe jumenta kushipa ea yunuwe, ã hawairakirãkatsis ikairã— aka

²³hawē benē yukakĩ:

—Haskakĩ ikis mĩ uĩ kakatsis ikai, ushe benatiã inũ huĩrukũtitiã nũ hanu habe itxamis ikis iriamabiakenã?— aka

kemakĩ yuikĩ:

—Ea haska shinãshũyamawe— aka

²⁴haska shinaĩ keska hawē benē yunua hawē tsauti dabe kabekãti dabe kabekãshuna aĩbu haki katsaumea, hawē dayaru hatxũ kai aĩbũ yunukĩ:

—Hau jumenta hawaira kushikainũ kusha kusha akubaĩwẽ, hau niti iyamanunã. ã mia yuiriamã niti imayamawe. ã mia yunuaya besti niti imashãwẽ— aka

²⁵jumenta kushikaini Mati Carmelo anu Deusũ hãtxa yuishunika hiwea anu kemaibũ hanua Eliseũ txai beiaibu uĩkĩ hawē merabewanika Geazi yuikĩ:

—Uĩwẽ! Sunẽm anu hiwea aĩbu huikiki. ²⁶Kushikaĩ haki nukushũ: “Mĩ haskaramẽ? Mĩ bene inũ mĩ bakerã, haskaramẽ?” akĩ yukatãwẽ— aka kushikaĩ haska yukabia yui pewama:

—ã peki— abestibirani niti ikama ²⁷mati anu mapekea Eliseuki nukutã dãti itã hawē bikerã dabe ikua, Geazĩ mepamanũ ikai Eliseũ nemakĩ:

—Hawē huĩti nishmahairaki. Haskakirana ikimẽkaĩ, meyamawe.

Haskashu Senhor Deusũ ea yuiriamaki— aka

²⁸hanushũ aĩbũ Eliseu yuikĩ:

—Shanẽ ibũ, bakeyakatsi ã mia yukama iniki. Haska mia yukama eki paranayamawe, iwanã, ã mia yuiniki— aka

²⁹hawē shinã unãtã hawē merabewanika Geazi Eliseũ yunukĩ yuikĩ:

—Hawaira petã kushikaĩkĩ ã mestẽti bibaini hawē hiwe anu katãwẽ. Tsuarakira mĩ nukua habe hãtxakĩ yukayamabaĩtãwẽ. Tsuãra mia yukai habe hãtxakĩ kemayamawe. Hawē hiwe anu hikitã hawē bake daka anu ã mestẽti hawē besu anu hanatãwẽ— aka Geazi hawairakaini kaya

³⁰hakia ha bakeishtã ewã Eliseu yuikĩ:

—Senhor Deus hiwea inũ mĩ hiweawẽ taeshũ miauma nenua ã kamaki, iwanã, ã mia yubaii. Ea nĩkawe— aka

haska wa nĩkatã Eliseu aĩbube kaya ³¹haskaitiã ha dukũ bebushũ Eliseũ mestẽti Geazĩ bakeishtã besuki hanabia hatũ hiwea inãma hawē bake hawa tukuamahairakẽ txĩtũkaini Eliseuki nukushũ Geazĩ yuikĩ:

—Haska mĩ ea yunua ã abiahu hawē bake hawa tukui besteãmahairaki— aka

³²Eliseuri manaũri hawē dĩtu anu mapeketã hawē dakatiki bakeishta mawa meshã daka ³³Eliseu bakeishta daka anu hikikaĩ hawē beputi

beputã hau merabewanũ Senhor Deus dayuikĩ yukatã ³⁴habe ma hãtxashũwẽ taea ha daka anu haki inai bakeishta mamaki beushũ bakeishtã kesha inũ hawẽ beru inũ hawẽ mekẽ mekĩ sheyuakeakea bakeishtã yura shanai taeaya ³⁵Eliseũ txibututã benitã Senhor Deusbe ana hãtxai hawẽ dĩtu merã nikukui henetã hawẽ dakati anu ana haki inai beutã bakeishta ikua dakakẽ hawaira bakeishta besteĩ 7ti axkĩ axkĩ iki bepesheaya ³⁶Eliseũ jumenta Geazi kena, hawẽ dĩtu anu hikia yuikĩ:

—Hawẽ ewa Suném anua ea kenashütãwẽ— aka

Geazi kaĩkaini kashũ hawẽ ewa kena dateyabi ka, Eliseu anu hikia yuikĩ:

—Na ma ana hiweaki, mĩ bakerã— aka

³⁷aĩbu benimahairakĩ Eliseu anu dãti ishũ yuitã hawẽ bake itã kaĩkainikiaki.

**Síria nawa Naamã bitxiki txamima teneai
Eliseũ kaya wanikiaki, na hãtxarã**

5 ¹Habiatiãri Síria nawa shanẽ ibuhairatũ hawẽ detenamenikabu shanẽ ibu yununika hawẽ kena Naamã pehaira Senhor Deusũ merabewakĩ Síria nawabu haki sinataĩbu hawẽ detenamenikabubetã Naamãnẽ hatu maemamakĩ keyuimawẽ taeshũ Síria shanẽ ibuhairatũ Naamã betxipaihairaya isĩ betsa bitxiki txamima tenekubainikiaki.

²Ano betsatiã Síria nawabu yumetsui bushũ Israelĩ enabu mai pakea anushũ hatu mese mese watã hatũ mabu inũ aĩbu txipash yumetsubaĩkĩ iyuyamabu ha txipash Naamãnẽ ainẽ dayaru escravo wayama ³shaba betsatiã ha Israelĩ enabu txipashã Naamãnẽ aĩ yuikĩ:

—Ë tsuma mĩ benerã, Samaria anu kashũ Deusũ hãtxa yuishunika Eliseube hãtxakĩ ea aka ha bitxiki txamima shusha watiruki— aka nĩkatã hawẽ bene habias yuia nĩkariatã

⁴hawẽ shanẽ ibuhaira anu Naamã kashũ habias hãtxa ha txipash hãtxashinakiri banabimakĩ yuia ⁵Síria nawabu shanẽ ibuhairatũ kemakĩ yuikĩ:

—Peki. Ikis hatũ shanẽ ibuhaira ã mia keneshunaii. Ë kene bui katãwẽ, hau mia shushawanunã— aka

kakĩ 30.000 prata pei heshe inũ 6.000 ouro pei heshe inũ 10 haya besiti tari pepa hawẽrua bui Samaria anu hawẽ tsumabube Naamã kashũ ⁶hawẽ shanẽ ibũ kene buma Israel shanẽ ibuhaira inã bitã dĩtu betsa anu kashũ kene bepeshũ uĩkĩ hawẽ hãtxa keneshina yuikĩ: —Ë hãtxa uĩkĩ hawẽ bitxiki txamima hau mĩ shushawanũ ã shanẽ ibu beshmas Naamã mianu ã nitxiaĩ, mĩ uinunã. Ea shushawashũwẽ— akĩ

⁷keneshina Israelĩ enabu shanẽ ibuhairatũ ha kene uĩ keyutã hawẽ datekĩ hawẽ tari ushnitã hawẽ anibu unanepabu hatu yuikĩ:

—Earã, ã Deus keskamẽ? Hatũ besti hiwea hatu inãtã hatu mebĩmiskẽ ã haska keskari watiru shinãkĩ ha shanẽ ibũ hawẽ huni betsa bitxiki

txamima ã shushawashũturu ea yunushinaki. Shinãkĩ uĩrakãwẽ. Nuku haska wakĩ nuku unãti waikiki, nukuki ana sinatakatsirã— hatu wa
⁸shanẽ ibũ kene uĩtã datekĩ hawẽ tari ushnishina txanibaunaibu Deusũ hãtxa yuishunika Eliseũ nĩkatã Israelĩ enabu shanẽ ibuhaira anu hau hãtxa bunũbũ: “Haskakĩ mĩ tari mĩ ushnishinamẽ? Ha huni ea anu yunuwe, hau ea uĩyununã. Hatũ ã Deusũ hãtxa yuishunika Israel anu ã hiwea hau tapĩyununã”, hatu wa bushũ shanẽ ibuhaira yuiabu,

⁹nĩkatã Eliseu anu Naamã yunua hawẽ tsumabu cavalo katsaumeabube hawẽ cavalõ tarãbaĩtiki mapua bui Naamã kai Eliseũ hiwe bebũ niti ika nikẽ ¹⁰ibubis kama hãtxa bunika Eliseũ yunua kashũ Naamã Eliseũ hãtxa yuishũkĩ: “Jordão Hene anu ka bututã 7ki nashi pukutãtani txukitãwẽ. Mĩ haskaya mĩ bitxiki txamima shushai mĩ yura sakara iki mĩ shũpĩshanaii”, aka

¹¹haska wa nĩkatã Naamã sinatahairakĩ hawenabu yuikĩ:

—Tashnikirã eki nukutã ea dapi nishũ hawẽ mekenika Senhor Deus ea yukashũkĩ ã bitxiki txamima hawẽ mekenẽ ea mebaũkĩ ea shushawashanimẽkaĩ, iwanã, ã shinãbiabirãshina haska wakinã, ea maĩwaĩmẽkaĩ. ¹²Damasco anu nukũ hene dabe Abana inũ Farpar Israelĩ enabũ mai pakea anua keskamaki. Nukuna pehairaki, dasibi hatuna binuarã. Shushanũ ika nukũ hene dabe anu ã nashitirumamẽ?— ikaini sinatahairatã hanua kaya ¹³hakia hawẽ dayarubu ha dapi bushũ yuikĩ:

—Shanẽ ibũ, Deusũ hãtxa yuishunikatũ mia merabewakĩ: “Hawara bikahairawẽ ea yunuwe”, ishũ mĩ haskakiri shinai? Hawẽ hãtxa txibaĩ mĩ ikatsi ikamaki. Hakia: “Hene Jordão anu nashitãwẽ”, akĩ mia yunua nashitã mĩ shushatiruki, iwanã, mia yuishurã, hawa bikamaki. Iki kawe— akabu pes nibiabai

¹⁴habũ pe shinai hatu nĩkatã Hene Jordão kesha anu butua haska Deusũ hãtxa yuishunika Eliseũ yunushu keskai 7ki nashi pukutãtani neshekeaya hawẽ bitxiki txamima shushai hawẽ yura berunã bitxi keskai shũpĩ ana detsis mese neamakẽ ¹⁵hawẽ yura ma shusha uĩtã Naamã inũ habe beshiãbu Eliseu anu ana txĩtũbaini haki nukunũ ibaini Eliseu tashnia nia Naamã haki kematã yuikĩ:

—Nenu Israelĩ enabu anu Deus Kayabi hayaki. Ikis ã ikũwaiĩ. Txanima mai hirabi anu Deus betsa hayamaki. Ë mĩ dayaruwẽ taeshũ hawara pepa mia inãkuinũ ishũ ã mia ea akaii— aka

¹⁶Eliseũ kemakĩ yuikĩ:

—Senhor Deusũ ea uĩãyã ã mia yubaii. Haska mĩ hawara ea inãkatsis ikai ã bitirumaki— aka

—Haskama biwe! Biwe!— akĩ heneamabia hawa biama Eliseũ hawa bikatsi ikama nemahairakubainaya ¹⁷hawã biama Naamãnẽ unãtã ana yuikĩ:

—Haskawẽ taeshũ yushibubu kẽwãkĩ mabuwẽ duawakĩ inabu ã ana kuakĩ menukĩ keyuama ishanaii. Mĩ mekenika Senhor Deus besti kẽwãkĩ

inabu kuakī ē menukī keyukubainaiwē taeshū Israelī enabū mai pakea anua saku ewapa dabe inū dabe mai mata washū mula dabeki dūtārabetā ē mae anu butāpa? Hi bau watā ha mai mātxiā anu haki dāti ika beti ishū Senhor Deus besti ē kēwākubaīshanaii. ¹⁸Hau ea kupiyamashanū na besti Senhor Deus ea yukashūkubaīshāwē. Yushibu Rimom kēwāti hiwe anushū ē shanē ibuhairatū kēwaī kakī ē pūyā ea pūtsūbaīkī ea iyua ē habe hikikai ē habe dāti ika beti ikūkainaya ē txakabu Senhor Deusū hau ana shināyamanū ea yukashūkubaīshāwē, hau ea kupiyamashanunā— aka

¹⁹Eliseū kemakī yuikī:

—Peki. Deus ē mia yukashūkubaīshanaii. Dateama unanuma kai petāwē— aka mai bitā hanua Naamā hawenabube kaīkaini txaihaira kariamakē ²⁰Eliseū dayarū shināki: “Mabu pepa hamē beshiābu Eliseū hawa biama Síria nawa Naamā ē tsuma Eliseū ma nitxiāki. Senhor Deuswē ē yubakaii. Hawaira txibaī kushikaini haki nukushū hawara bewanaibu eā ē bi kaii”, ikaini

²¹kushikaīki Geazī Naamā txibaī ha itxū kushikainaya nasaukeshū Naamānē uītā hawē cavalō tarābaīti niti atā mananū ika butua nikē ma haki nukua Naamānē yukakī:

—Hawa kaya ē txakabuwabiranai mī txibaī?— aka

²²Geazī kemakī yuikī:

—Hawamaki. Hakia Efraimnē enabū mati matipa anua Deusū hātxa yuishunika berunā dabe dama bei hikikāshu ē mia yuiyunū ē tsumapā ea yunushuki. 3.000 prata pei heshe inū 2 haya besiti tari hawērua mī hatu inākuītirukiaki. Haska ē mia yukayushuki— aka

²³Naamānē kemakī:

—Haska bestima menā 6.000 prata pei heshe hatu bishūriwe— akī hau binū yunuhairatā saku dabeki 6.000 prata pei heshe inū 2 haya besiti tari mistukī naneshū hau bushunūbū hawē dayaru dabe iamashū Geazi bebū hatu nitxiā ²⁴kai Geazi hatube mapeketā saku dabe hatu mebīshū nitxiā buaibū hiwe hune anu arutā ²⁵txipu hawē tsuma Eliseu bebū ni tushiai yukakī:

—Geazii, harakiria mī huai?— aka

Geazinē kemakī yuikī:

—Ē harakiri kamaki— aka

²⁶hakia hātxa kushipawē Eliseū yuikī:

—Mia inū ika hawē cavalō tarābaīti anua Naamā butuai ē yushī mibe nishū dasibi ē uīshuki. Pei heshe inū haya besiti tari hawērua mī bishurā, pemaki. Yunu bai inū, uva nishi beshea bai inū, txashuwā inū, ina awa inū, huni dayarubu inū, aību dayarubu ha peiwē mī bikatsis ikai txakabuhairaki. ²⁷Haskawē taea Naamā bitxiki txamima shushakaīshurā, mikiri tekikūkaīshanikiki. Mia bestimarā, mī bakebu pakubainaibu ha bitxiki txami ipapakeshākanikiki— aka

ana dayashunama Eliseū hiwe anua tashnikaini Geazi hawē yura hirabi ma txami keyua matsi tākia keska hushupahaira uinibukiaki.

Due henē pukua dami wakī Eliseū nūtanikiaki, na hātcharā

6 ¹Txipu shaba betsatiā Deusū hātxa yuishunikabu Eliseube hiweshū betsā Eliseu yuikī:

—Uiā. Mibe hiwea hanu nū ushamis dītu hashuhairaki. ²Ana hiwe bena ewapa wakī hashpa duakabi wanū ika Hene Jordāo keshakea nuku tibitū hi bestitxai txaipa nū meshteī kai mī nuku yunutirumē?— akabu Eliseū hatu yunukī:

—Butākāwē— hatu waya

³betsā Eliseu yuikī:

—Hamaki. Nuku banawakaini nukube kawē— aka kemakī:

—Peki. Ē matube katiruki— ikaini

⁴Hene Jordāo anu hatube Eliseu butua hanushū hi meshtekī taewaibū ⁵huni bestitxaitū hi meshtekī taewaya due hawē bake anua hātsekekaini henē pukuai uī sai ikī yuikī:

—He ee. Pemaki! Yusinaā, na duerā, huni betsana ē beāshuki. Ē haska washanai?— aka

⁶Eliseū yukakī:

—Hani kaya pukushumē?— aka

hanu pukushu anu metua hanushū Eliseū hi txaipa meshteshū hanu due pukushu anu putakī urēshū dami wakī due nūtātā ⁷yunukī:

—Neshewe!— aka meshūkaī due tsumatā neshebaini benimabaikī hi buaibū

Síria nawabu Eliseū hatu unātimaska wanikiaki, na hātcharā

⁸Síria nawa shanē ibuhairatū Israelī enabu maemanū ika ana hatube datenameaibu hawē detenamenikabu shanē ibubube itxa hatube yubakai Síria nawa shanē ibuhairatū hatu yuikī: “Hune hari bushū Israelī enabu detenamenikabu e imatā maemakī nū hatu keyushanaii”, hatu wakī hari hanu huneshanaibu hatu yui yubakai ⁹hatū shinā haskaibu Eliseū unātā Israelī enabu shanē ibuhaira anu Eliseū hawē hātxa bumakī yuikī: “Síria nawa detenamenikabu hari huneshū matu detekatsis iki manaibuwē taea hari buyamashākāwē”, hatu wa ¹⁰Israelī enabu shanē ibuhaira Eliseū yuia hawē hātxa nīkatā Síria nawa detenamenika huneabu dūkekubainibukiaki.

¹¹Hanua Síria nawa shanē ibuhaira haska shinātiruma hawē shanē ibu beshmasbu hatu kena itxabu hatu yuikī:

—Ea yuikāwē, haska nū yubakamis tsua nukunabu kashū Israelī enabu shanē ibuhaira bebūkiri yuitātāmismēkainā— hatu wa

¹²habu bestitxaitū kemakī yuikī:

—Shanē ibuū, nukū nū yuismaki. Hakia Deusū hātxa yuishunika Eliseu Israelī enabube hiweshū haska mī hune nuku yuimis inū haska mī ushatianua mī hātchai unātā Israelī enabu shanē ibuhaira unāmaki hawē shanē ibuhaira yuimiski— aka

¹³nīkatā hatu yunukī:

—Hau Eliseu atxinūbū ē hanu hatu yunutiru yuka ikaūkī unātā watākāwē— hatu waya huni betsa nīkatā hawē shanē ibuhaira yuikī:

—Israelī enabu mai pakea anu mae betsa hawē kena Dotā anu ikis hiweakiaki— aka ¹⁴hanua hawē detenamenikabu itxapa cavaloki katsaumbainaibu inū, cavalō tarābaītiki mapubainaibu inū, hatiri maī buaibu Síria nawa shanē ibuhairatū hatu yunua hune meshu merā bui Dotā anu hikitā mae hirabi kebauni nati ikabū ¹⁵ushashini bestēkauā penamahaira Eliseū dayaru betsa butukaikī cavaloki katsaumeabu inū cavalō tarābaītiki mapuabu itxapabu mae hirabi kebauni nati ikabu uī datekaini ana hiwe merā hikishū Eliseu yuikī:

—Yusinaā, nukū mae hirabi keshebaunabuki. Ikisrā, nū haskai?— aka

¹⁶Eliseū yuikī:

—Nukū merabenanikatunarā, hatuna binuaki, habutimarā. Hawa dateyamawe— iwanā,

¹⁷Eliseū Senhor Deus ea akī yuikī: “Hau hatu uinū ē dayarū beru betsa watā uīmawe”, atā “Senhor Deusuū, haska ē mia ea akaii”, aka Senhor Deusū hawē beru bepeškī pewashuna, txi keska katsaumeabu itxapahaira inū txi keska cavalō tarābaītiki mapuabu itxapahairari mati anu Eliseū hiwe keshekī keyubaunabu hawē dayarū uībaunaya

¹⁸atxinū ika Síria nawabu txaima bei taeaiūbū Eliseū Senhor Deus ea akī yuikī: “Síria nawabu beaibu mī hatū beshush wakī betsa wanū ē mia ea akaii”, aka

haska Eliseū ea akai keska habū shinā haikaimas wakī Senhor Deusū hatu beru betsa wakē ¹⁹hatu unātimaska wakī Eliseū hatu yuikī:

—Narā, ha baimaki. Ha maewā mā benairā, nenumaki. Ha huni mā benai anu matu iyunū ea txibābaikāwē— hatu watā Samaria maewā anu hatu iyua ²⁰hikitā Eliseū ana dayuikī: “Senhor Deusuū, hau shinākī uī pewanūbū ikis habū beru pewakī betsa wawe”, aka hanushū Senhor Deusū hatū beru betsa waya bepesheai keskatā uībaūkī: “Habaa! Nū Samaria merāki!” ikī uī dateaibū ²¹Israelī enabu shanē ibuhairatū hatu uītā Eliseu yukakī:

—Epaā, dete keyukī hatu tenāpa?— aka

²²hakia Eliseū kemakī:

—Haskamaki. Hatu tenāyamawe. Pia inū matxatu txaipawē detenamekī huni betsabu atxitā txipu mā hatu tenāmismē? Nū haska beyatirumaki. Hakia hatū detenameti dasibi hatu mebī keyutā piti inū

mabesh hatu pimakāwē. Hau yaniwatā hatū shanē ibuhaira anu hau unanuma bunūbū hatu nitxīkāwē— aka

²³piti pepa inū mabesh pepa itxapa aībuaibū bawabu hatu inākubaunabu, pikī mabesh akī keyuabu, Israelī enabu shanē ibuhairatū unanuma hatu nitxiā, hatū mae Síria nawa shanē ibuhaira anu txītūbainaibū haska wakī Israelī enabu Síria nawabū hatu date date atā hatū mai pakea ibuwakubaīmisbu hatu heneyubainibukiaki.

Deusū hātxa yuishūkubaini Eliseu mawanikiaki, na hātcharā

13 ¹⁴Mawakatsi Eliseu isī teneai Israelī enabu shanē ibuhaira Jeoási uinū ika kai hikia haya kashakī ikushū yuikī:

—Epaā, epaā, mī Israelī enabu mekenika kushipahairaki, huni detenamenikabu itxapa keskarā— aka

¹⁵nīkatā Eliseū shanē ibu yunukī:

—Kanū inū pia hatira bitā tsumawe— aka

kanū inū pia bitā ma tsumakē ¹⁶⁻¹⁷Eliseū ana yunukī:

—Bari huaikiri hanu uīti shui bepēwē— aka

ma bepēkē Eliseū ana yunukī:

—Bishkukatsi kanū inū pia pewawe— aka

kanū inū pia shanē ibū pewaya Eliseu hawē petxiuria benikaī nishū shanē ibū mekē dabeki mepishū ana yunukī:

—Ikis bishkuwe— aka

pia bishkuaya hātxa kushipawē Eliseū yuikī:

—Senhor Deusū mekenikā piaki, Síria nawabu maemati piarā. Afeca anushū hatu detekubaīkī Síria nawabu mī hatu tenā keyushanaii— itā

¹⁸txipu shanē ibu Eliseū ana yuikī:

—Pia ana tsumawe— aka

ana bikē Eliseū ana yunukī:

—Ikis piawē mai bekush bekush awe— aka

shanē ibū dabe inū bestiki piawē mai bekush bekush akī heneaya

¹⁹haska waiwē taea Eliseu haki sinatakī yuikī:

—Hatu detekubaīkī Síria nawabu maemakī keyukī yamawashanū, iwanā, 5 kasmai 6ki piawē mī mai bekush bekush ati sharashuki. Hakia dabe inū bestiki mai mī bekush bekush ashuwē taeshū dabe inū bestiki Síria nawabu mī hatu maemashanaii, hatu tenākī keyuamarā— atā

²⁰ana hātxa wama Eliseu mawa hanushū maiwanibukiaki. Ano tibi Israelī enabū mai pakea anu Moabe nawabū hatu itxakawai yumetsubu yumetsui bebirā bebiranaibū ²¹ushe betsatiā hatū haibu ma mawa Israelī enabu hunibū maiwanū, iwanā, mai pukīkī Moabe nawa yumetsubu beaibu betxitā Eliseu mai wanibu anu hatū haibu mawa datābaini datei pashaibū, hakia ha huni mawatū yura Eliseū shau mamaki hanakī hawē shau metsamabu ana hiwei benitā inū kanikiaki.

²²Israelí enabu shanē ibu Jeoacaz hiweyukē Síria nawa shanē ibuhaira Hazaelí Israelí enabu dasibi itxakawakí hatu tenākí yamawapanã ²³Abraão inū, Isaque inū, Jacóbe Deus hatube yubakaniwē taea Israelí enabuwē nuikí hatu shinākí Senhor Deusū hatu merabewakí Síria nawabu hatu nemashūkubainikiaki. Hatu txakabuwakí yamawakatsi ikama inū ha bebunua hatu putakatsi ikama ikūkainikiaki. Na habiatiã Senhor Deusū hatu mekeriakubainikiki.

²⁴Hanua Síria nawa shanē ibu Hazael mawaya hawē huni bake hawē shātukū Ben-Hadade shanē ibunikiaki. ²⁵Hanua Jeoacazí huni bake Jeoás shanē iburiatã hawē epa mae mebinibu Ben-Hadade kushipai anua Jeoás dabe inū bestiki habe detenamekūkaikí ana hatu putamanikiaki. Haska wakinã, Israelí enabū mae Jeoásí Ben-Hadade detenamekūkaikí hatū mae ana hatu bishūkí hatu ibuwamanikiaki.

Ezequias Judá enabū shanē ibuhaira inikiaki, na hãtxarã
(2 Cr 29.1-2)

18 ¹⁻²Samaria anu Israelí enabu yunui Elá huni bake Oséias 3 ano shanē ibukūkainaya Acazí huni bake Ezequias 25 bariya shanē ibui Judá enabu yunui Jerusalém anu 29 ano shanē ibukūkainikiaki. Ezequiasí ewarã, Abi inikiaki. Abí eparã, Zacarias inikiaki. ³Haska hawē shenipabu Davi hiweshū apauni keska wakí kaneama Ezequiasí txibākubainai Senhor Deusū haska betxipai ai ashuaí uí hawē benimakūkainikiaki. ⁴Ha shanē ibushunã, mati keyatapa anua yushibubu kēwāti hiwe meribi tibi hau txakabuwakí pusa pusa anūbū hatu yunua hanua betsa yushibu dami betsa betsapa dasibi nitxiniburi hau tekekí keyurianūbū inū mane bronze dunu dami Moisé hatu ashuni kenakí: “Neustākí”, anibu kēwākí ha bebū Israelí enabū inīti kuakubaĩmisbu Ezequiasí hatu mebī keyutã hatu pusa pusa amanikiaki.

⁵Israelí enabū mekenika Senhor Deus Ezequiasí ikūhairawakubaini shanē ibukūkainirã, ha shanē ibu tibi ha bebū inū ha txipu Judá enabu shanē ibu ikubiranibu Ezequias pepahaira keska tsua betsa hayama inikiaki. ⁶Haska Senhor Deusū Moisés yununi txibākí hawē yunuti inū hawē nemati hamebi heneama ikūkaikí Ezequiasí Senhor Deus nīkakí txibākubainaiwē taeshū ⁷hawara atimapa tibi pewakí taewakubainaiwē taeshū Senhor Deusū Ezequias merabewakí pewakí keyumanikiaki.

Haska wakí Assíria nawa shanē ibuhaira Ezequiasí danākí ana hawē tsumatã hawē imposto ana pakakatsi ikama haki sinatanikiaki. ⁸Ha inū, hawē mai pakea anua Filisteu nawabu nitxíkí hawē detenamenikabubetã Ezequiasí hatu maemakubaikí ha hanu keshei irutã uíti hiwe pishta keyatapa inū hatū maewã mishki kenebaunibu betsa betsapa anu hawē detenamenikabubetã hatu mebīkí keyukí Gaza mai pakea hirabi ibuwaniakiaki.

Israeli enabū maewā Samaria atxinibukiaki, na hātcharā

⁹Ezequias shanē ibui ma 4 ano ikainaya hanua Samaria anu Elá huni bake Oséias Israelī enabu anu shanē ibui ma 7 ano ikaitiā Assíria nawa shanē ibuhaira Salmaneser hawē detenamenikabu mirima iwei Samaria anu hushū hau mae dasibi keshebaunūbū hatu yunua keshekī keyubaunabu atxinū, iwanā, harakiri nitimawakī hatu kebēkubainabu ana hawawē kushipatirubumakē hatu detekubaikī ¹⁰3 ano atimas hatu di akī keyukī hatu atxinibukiaki. Ezequias shanē ibui ma 6 ano ikaya Samaria anu Oséias Israelī enabu shanē ibui ma 9 ano keyuaya Assíria nawa detenamenikabū atimas Samaria atxinibukiaki. ¹¹Hanushū hatū mae pakea hirabi anua Israelī enabu dasibi maī hatu nitxiā bukatsi ikabumabiakē hawē detenamenikabū hatu iyukī hashiwē hatu txatxi txatxi akubainaibū hatū mai pakea Assíria anu Assíria nawa shanē ibuhairatū hatu iyukī hatu bitxitā mae betsa Hala inū mai pakea betsa Habor inū Hene Gozā dapi inū Média nawabū maewā betsa betsapa anu hatu hiwemakī hawa pakama hatu dayamapaunibukiaki. ¹²Senhor Deusū tsuma Moisi hatu yusitā hatu keneshūbiani inū haska Deusū betxipai ai keskai ana hawē hiwebainabumakē hatube Senhor Deus yubakabiani hatū mekenika Deus hawa nīkabuma ikubainaibuwē taea Assíria nawabū hatu itxakawaibu Senhor Deusū hatu nemashunama inikiaki.

Judá enaburi atxinū ika Assíria nawabu benibukiaki, na hātcharā
(2 Cr 32.1-19; Is 36.1-22)

¹³Txipu 10 ano kakē Ezequias Jerusalém anu shanē ibui ma 14 ano keyuaya Assíria shanē ibuhaira betsa hawē kena Senaqueribe hawē detenamenikabu mirimabube Judá enabū mai pakea anu hushū Jerusalém dapi hatū mae mishki kenebaunibu tibi dapi mapushū pia inū hashi inū mashash turewē tsaka tsaka akī puta puta akubaikī ushe itxapa kaya atimas hatu dasibi atxikī keyukubainaibū ¹⁴haskai buwē taeshū Jerusalém anushū Judá enabu shanē ibuhaira Ezequiasī hawē hātcha keneshū bumakī: “Ē kaneniki. Hawara mī ea yukai ē mia pakashanai, ē mai anua mia inū mī detenamenikabu mā kanunā”, atā keneshūtā huni betsa bumakī yunua mae betsa Laquis anu Assíria nawa shanē ibuhaira anu hawē kene bushū inā bishū uītā kemakī hati hau pakanū 30 talento prata mane, ha 10.000 quilo pratara, inū 30 talento ouro mane, ha 1.000 quilorā, Assíria nawa shanē ibuhairatū Ezequias hātcha kushipawē yunua ¹⁵haska wawē taeshū Senhor Deus kēwāti hiwe anua Ezequiasī mane prata hati betxishū hatu bimakī keyushū hanus itxawashū ha katxu hawē hiwe hawērua anu kai hikishū hawē mabu pepa aruti dītu anua hawē mane prata hirabi hatu bimakī keyuriashū habianuri itxawashū habiastiāri ¹⁶Senhor Deus kēwāti hiwe hanu hikiti shui istabī dabenibu

inũ, matsanibu inũ, hawẽ beputi dabe wanibu bemakis inũ uke merã Ezequiasĩ ouro mane tashipawẽ hatu buyamabaũtã hatu bepushmani ha mane ouro tashipa dasibi Ezequiasĩ hatu tsekamakĩ keyumashũ haki dasiwatã Assíria nawa shanẽ ibuhaira anu hau bunũbũ hatu yunua buaibũ

¹⁷hatũ prata mane inũ hatũ ouro mane inã bibiatã hawa daeama haki sinatai heneama Jerusalém txakabuwanũ, iwanã, Laquis anua hawẽ detenamenikabu shanẽ ibu kushipa Tartã inũ, hawẽ merabewanika haki txiti ika inũ, shanẽ ibu beshmas kushipa betsari hawẽ detenamenikabu mirimabe Ezequias anu Assíria nawa shanẽ ibu Senaqueribẽ hatu yunua bui Jerusalém dapi hikitã pashku debu mishkiwẽ buyabaĩkĩ ùpash hababaĩti wanibu dapi inũ hanu kashũ tari patsamisbu bai ka dapi hatũ tari hiwe pũtebaũshina ¹⁸shanẽ ibu Ezequiasbe hãtxanũ, iwanã, kenabu ha kama hawẽ merabewanikabu Hilquiasĩ huni bake Eliaquim hatũ shanẽ ibũ hiwe mekeshũmis inũ, Sebnã shaba tibi ikaibu hatũ kenekubaĩmis inũ, Asafẽ huni bake Joá shanẽ ibu keneshunika Assíria nawa shanẽ ibu beshmasbube hãtxanũ ika, Jerusalém anua tashnibaĩ hatuki nukuabu ¹⁹Assíria nawa detenamenikabu shanẽ ibu Rabsaquẽ hatu yuikĩ:

—Assíria nawa shanẽ ibu kushipahairatũ hãtxa matũ shanẽ ibu Ezequias eska yuishũtãkãwẽ: “Haratutũ mia merabewai, mĩ haki txiti ika ikai? ²⁰Yuba hãtxa hawẽrua itxapa mĩ unai keska beparãbaĩ detenamea mĩ unãmahairaki! Ë hãtxa mĩ danãmiswẽ taea haratu mĩ haibuki mĩ txiti ika ikai? ²¹Egito nawabũ mia merabewashanai mĩ shinaĩ ã unai. Hakia haburã, hatũ shanẽ ibube hawa kushipa hayabumaki, mã dasibi haki txiti ipanãbunã. Dasibibũ hawẽ hãtxa nĩkakĩ ikũwaiũbu, Egito nawa shanẽ ibu Faraó babukĩ tsua merabewatirumaki. ²²Ha inũ, matũ yuikĩ: Hau nuku merabewashanũ: Nukũ mekenika Senhor Deus ha besti nũ ikũwaiĩ, akĩ mã yuitiruki. Hakia matũ mekenika kẽwãpanãbũ matunabu Ezequiasĩ nemakĩ habũ mati keyatapa anua kẽwãti meribi inũ habu inabu kuashũkĩ menuti txi tapu dasibi hawẽ dayarubu txakabuamakĩ yamawakĩ hatu keyumabiatã hanushũ Ezequiasĩ hatu yunukĩ Judá enabũ mai pakea anu hiweshũ Jerusalém anushũ besti Senhor Deus kẽwãkĩ inabu nami inũ hawẽ sheni kuakĩ menukĩ hau keyukubaĩshanũbũ mĩ shanẽ ibu Ezequiasĩ hatu yununiki, matũ mekenika sinatamakinã. ²³Haskawẽ taeshũ ã tsuma Assíria nawa shanẽ ibuhairabe yubakanamekãwẽ. 2.000 hunibu cavalo katsaumetirubu mĩ hayakẽ 2.000 cavalo ã mia inãshanai. ²⁴Hamẽ miarã, hawa hayamabia hawa kushipawẽ ã shanẽ ibu beshmasbu mĩ hawa hatu kushimatirumaki. Mĩ daka haki mapuabu detenameti cavalo Egito anua bikatsis ikai? Haska shinãma hakimawe. ²⁵Ha inũ, na mai pakea txakabuwakĩ yamawanũ, iwanã, matukiri Senhor Deus ã yukama ikima dabanẽ mĩ shinaĩ? Txakabuwakĩ yamawakĩ keyutãkãwẽ, iwanã, txanima Senhor Deusũ ea yunuimaki”, haska ã shanẽ ibuhairatũ ea yuishinaki. Hawẽ hãtxa nĩkahairakãwẽ— hatu wa

²⁶Hilquiasĩ bake Eliaquim inũ, Sebna inũ, Joá kemakĩ yuikĩ:

—Nũ mia ea akaii. Arameu hãtxawẽ nukube hãtxawe, nũ nĩkairã. Mishki kenebaunibu mamaki manishũ nukunabũ nĩkakanikiki. Haskawẽ taea Hebreu hãtxawẽ nukube hãtxayamawe— akabu

²⁷hakia Assíria nawa detenamenika shanẽ ibũ hatu ana yuikĩ:

—Matũ tsuma inũ matu besti anu Assíria nawa shanẽ ibuhairatũ ea yunuamaki. Haska ẽ dama yuishurã, mishki kenebaunibu anu mapushũ hau habũri nĩkarianũbũwẽ. Habia mã nĩkai keskari nĩkatã habubetã nuitapakĩ ibubis matũ pui pikĩ matũ isũ mã ariakubaĩshanaii, ma matũ maewã nũ atxi keyukenã— iwanã,

²⁸nishũ habias Hebreu hãtxa kushipawẽ ana hatu yuikĩ:

—Assíria nawa shanẽ ibuhaira Rabsaquẽ eska matu yuikiki. Nĩkahairakãwẽ. ²⁹“Ë kushipawẽ matu detekĩ ẽ matu itxakawai haska washũ matũ shanẽ ibu Ezequiasĩ matu pashawatirumaki. Hawẽ txani hãtxawẽ matu paraĩ ana nĩkayamakãwẽ.” ³⁰Hamẽ nuku nĩkama matũ shanẽ ibu Ezequiasĩ shinãkĩ matu yuikĩ: “Senhor Deusũnã, txanima kayabi nuku merabewashanikiki, hatu nuku nemashũkinã. Na maewã Jerusalém Assíria nawa shanẽ ibuhairatũ hau atxiyamashanũ Senhor Deusũ amama hatu nemahairashanikiki”, akĩ matu yuibia ³¹hawa nĩkayamakãwẽ. Ë shanẽ ibuhairatũ ea yunukinã, ẽ matu yuinũ ea yuishinaki: “Habe unanuma hiwekũkaĩkatsi daenamebukuĩ tashnibirã ea anu beshũ ea kẽwãri bekãwẽ. Nũ ma haskai peaburã, matu tibitũ matũ uva bimi inũ matũ hi bimi figueira pikĩ matũ txatxa ùpash mã akubaĩshanaii. ³²Txipu misi inũ, uva vinho hau washanũbũ shekiwã trigo bai inũ, uva bimi bai haya ha inũ, piti sheni wati oliva hi inũ, buna bata itxapa hayari mai pakea pepa matuna keskari anu ẽ shanẽ ibuhairatũ matu dasibi iyushanikiki. Matu haska wa mã hiwei pekubaĩtirubuki. Buni mã mawama ikũkaĩshanaii.” Hamẽ mã nuku nĩkama Ezequiasĩ matu parãkĩ yuikĩ: “Senhor Deus hushũ nuku merabewaiwẽ taea hawa dateyamakubaĩshãkãwẽ”, matu wakubainairã, ³³eskamisbukiri matu yuinũ nĩkakãwẽ. Assíria nawa shanẽ ibuhairatũ kushipa nemakĩ yura betsa betsapabũ mekenika yushibubũ hatu merabewama ipaunibuki. Ë uiniki. ³⁴Ha mae dabe Hamate inũ Arpade hatũ mekenika yushiburã, hania? Hawa hayamaki. Ha inũ, mai pakea Sefarvaim mekenika yushibu inũ, mae betsa Hena mekenika yushibu inũ, mae betsa Iva mekenika yushibuburã, hania? Hawa hayabumariki. Assíria nawabu kushipahairabũ Samaria atxiaibu haskatã merabewatirubuma irianiki. ³⁵Haratu mekenika yushibubũ hatũ mae hatu nemashuni mã uĩmamẽ, Assíria nawabũ hatũ kushipawẽ hatu itxakawaitianã? Yushibũ hawa hatu merabewama iyamaki. “Senhor Deusũ Jerusalém merabewakĩ nuku mekeikiki”, ikinã, haskakĩ mã shinã txakaraii?— hatu wa

³⁶hau hatu hãtxa kemayamanũbũ shanẽ ibuhaira Ezequiasĩ bebũkiri yurabu yunushinawẽ taea mishki kenebaunibu anu mapushũ

detenamenikabū nīkai pes hawa hātxa taskama mapuabū ³⁷hanushū Eliaquim hatū shanē ibū hiwe mekemis inū, Sebnā shaba tibi ikaibukiri keneshūkubaīmis inū, Asafē bake Joá shanē ibu keneshunikatū hatū hātxa nīkatā huīti nishmahairatā hatū tari ushnibaini haska Assíria detenamenika shanē ibu Rabsaquē ma hatu yuishu Ezequiasiki txanikī yuitanū ika Jerusalém anu hikibaī yuinibukiaki.

Judá enabū mai pakea hawa meama Senaqueribe inū hawenabu dasibibū henebainibukiaki, na hātcharā
(2 Cr 32.20-23; Is 37.1-38)

19 ¹Hatū hātxa nīkatā shanē ibu Ezequiasī hawē tari hawērua sawea ushnitā pekatā huīti nishmahaira haska nuhairai hatū beyawē taea hatu uīmai besha tari sawetā Senhor Deus kēwāti hiwe anu kai hikitā ²Eliaquim ha hatū shanē ibuhairatū hiwe mekemis inū, Sebnā shaba tibi ikaibukiri kenekubaīmis inū, hawenabu Deusbe hāttxashunika mestebubu besha tari saweriabu hatu itxawashū Amozī huni bake Isafás Deusū hātxa yuishunika anu hatu yunukī ³hau shanē ibu yuishūtanūbū hatu yuiki: “Natiā nū pemahairaki. Nū ma bika teneai. Dakewakī nuku ma atxitā nuku babu wakī aību bake kaī ana kushipa hayaisma keska nuku ma wakanikiki. Ma Senhor Deusū nuku kupimēkaī. ⁴Assíria shanē ibuhairatū hawē tsuma Rabsaquē yunushina nukū mekenika Deus hiweaki hātxa txakabui shetxakai hawē detenamenika shanē ibu hātchai mī mekenika Senhor Deusū nīkashumēkaī”, ishū, “Ē shinaī. Hawē hātxa nīkashishū Senhor Deus mī mekenikatū hau ibubis hatu kupishanūwē. Nuku eskarabes nū hiweyuabu Assíria nawabū nuku atxiriama hau nuku merabewashanū Senhor Deus dayuikī nuku yukashūwē, akī ea yuishūtākāwē”, atā hatu yunua

⁵Isafás anu bushū Ezequiasī hātxa yuishunabu ⁶nīkatā hau hatū shanē ibu yuitanūbū Isafási hatu kemakī: “Senhor Deusū eska hatukiri yuikiki: ‘Assíria nawa shanē ibuhairatū hawē shanē ibu beshmasbu hatu yunua beshiā ekiri shetxakai hātxa txakabukī matu yuishuwē taea hawa dateyamawe. ⁷Uīkāwē. Hawē maewā anu hau hawaira txītūkaītanū kaka txakabu Assíria nawa shanē ibuhaira ē banabimai. Hanua hari kai harishū txatxi txatxi akabu mawai kaikiki’, akī matū shanē ibu ha hātcha ea yuishūtākāwē”, hatu wa

⁸Laquis mae anua Assíria nawa shanē ibuhaira ma kaīkaīshina hawē shanē ibu beshmasbū bana nīkatā Jerusalém anua Assíria detenamenika shanē ibu Rabsaquē haki nukui kai maewā betsa Libna atxinū ika hawē detenamenika betsabube Assíria nawa shanē ibuhairatū hatu yunukubainaiki nukuabu ⁹Assíria detenamenikabu maemanū ika Egito nawabu merabewai Etiópiā nawa shanē ibuhaira Tiraca hawē detenamenikabu itxapabube beaibukiri Libna anushū Assíria nawa shanē ibuhairatū nīkatā hatu nemai kariama Judá enabu shanē ibuhaira

Ezequias anu hau hawē hātxa bushūtanūbū hawē hātxa yuishunikabu yunukatsi ¹⁰hawē kenenika kenemakī yuikī: “Jerusalém ē kushipawē ē atxitiruma dabanē mī mekenika Deus mī ha ikūwainā, harā, txaniki. Ana hawē parā hātxa ikūwāyamawe. ¹¹Mai pakea tibi Assíria nawa shanē ibuhairabū yamawakatsi ikī hatu yamawanibu mī nīkama inimē? Hatu haska waniwē taearā, earā, ea nemakī binutā mī hiwetirumē? Iubis haska shināyamawe. ¹²Mae betsa betsapa Gozā inū, Harā inū, Rezeze inū, Éden enabu Telassar anu hiweabu habū yushibubū hatu merabewabumakē enabu shanē ibukī atxikī hatu dasibi yamawakī tenākī txanima keyunibuki. ¹³Hamate shanē ibu inū, Arpade shanē ibu inū, Sefarvaim shanē ibu inū, Hena shanē ibu inū, Iva shanē ibuburā, hania? Hayabumē?”, ashū hawē hātxa kenetā Ezequias anu hatu bumaya

¹⁴shanē ibu beshmasbu Jerusalém anu bushū hikiti shui anushū Ezequias inābu bitā hawē hiwe anu kashū txuretā hawē hātxa uikī keyutā Deus kēwāti hiwe merā kashū Deus bebū bepēshū hanatā haskakiri Deusbe hātxakī: ¹⁵“Israelī enabu mekenika Senhor Deusuū, mī hatube yubakani hātxa arutī bau mamaki querubin dabe tsaua anu hatu mamaki shanē ibu mī tsauaki. Nai inū mai hirabi mī dami waniwē taea mai hirabi anu shanē ibu tibitū enabu dasibi miā besti mī hatu yunumis mekenika Deuski, Deus betsa hayamarā. ¹⁶Senhor Deusuū, ea uikī ea nīkawe. Mī beru bepeshetā hawē hātxa kene uiwē. Mī mia Deus hiweaki mikiri hātxa txakabukī mia danākī kenea dasibi eanu Senaqueribē hatu bemashuki. Uiwē. ¹⁷Senhor Deusuū, txanimaki. Hatū mai pakea anu hiwebaunabū inū hawara yurabū anibu Assíria nawa shanē ibubū hatu dasibi tenākī yamawanibuki. ¹⁸Txanima Deus kayabima habū mekenika yushibubu dami txi anu napukī hatu menukī keyurianibuki. Ha haska wakinā, mekenika deus kayabima anibuki. Hi inū mishki dami wakī hunibū akī kēwāti mekenika yushibubu akubainibuwē taeshū Assíria nawabū hatū dami teke teke akī menukī keyunibuki, yamawakinā. ¹⁹Senhor Deusuū, mia besti mī mekenika Deuski”, iwanā, “Mai hirabi anu yurabu shukua betsa betsapabū hau mia unākī tapīkubaishanūbū Senhor Deusuū, mī nukū mekenika Deuswē taeshū ikis Assíria nawabu kushipabu nuku nemashūkī nuku mekekubaishāwē”, ikaya

²⁰hanushū Amozī bake Isaíasī haska Senhor Deusū yuishu hau Ezequias yuitanūbū Isaíasī hatu yunukī: “ ‘Assíria nawa shanē ibuhaira Senaqueribe ikaikiri mī ea yukakī yuishu ē nīkashuki’, akī Israelī enabu mekenika Senhor Deusū mia yuikiki”, akī ē mia yuiaii.

²¹Haska Assíria nawa shanē ibuhaira ishanaikiri Senhor Deusū hakiri hātxakī yuishurā, eska washanikiaki. Nīkawe:

“Senaqueribeē, ha maewā Sião txipash keskatū mikiri usaikiki.
Senaqueribeē, mī kaikainaya buri buri ikī

- Jerusalém anu hiweabū mikiri kasheshākanikiki.
- 22 Tsuki sinatai mī hātxa txakabushinamē?
Keinā, tsuki beru txākātā ha iki mī kūyā ishiāmē?
Enabu Israel hatu ha aki txanima mī eki ishiāki, hatū mekenika
meribi pepa hiweakirā.
- 23 Mī hātxa bushunika hatu yunukī ea Senhor Deus mī ekiri hatu hātxa
txakabumashinaki.
Kēkī hatu yuimakī:
‘Líbano mati matipa mamaki hanu tsua mapeketiruma anu
ē cavalō tarābaītiki detenamenikabu mapubaini
mirimabube ē mapekeimaki.
Hanushū hatū kusha keyatapahaira inū hatū hi betsa cedro
hawēruahaira ē hatu meshtemaimaki.
Mati keyatapa mapekeyutā ha mamaki bai bana keska ni shukua
anu nukui ē hanu hikimaki.
- 24 Mai pakea betsa ē haska uīriama betsa betsapa anushū
ūpash pukī keyutā ha ūpash ē akubainimaki.
Ē pai pai ikainai tsuā ea nematiruma
Egito hene tibi ē netsukubainimaki’,
ikī mī hatu yuimashinaki.
- 25 Hakia mī haska hatu wamaimarā,
ē Senhor Deus ma bebūkiri yubakanishū ē mia amaima
mī unāmamē?
Nenumahaira mī shenipabutiā ē hatukiri yubakani
natiā miā mī hatu akubainimaki.
Maewā mishki kenebaunibu betsa betsapa txakabuwakī
dasibi teke teke akī
hanus mishki mātxiā keska
mī hatu yamawakubainimaki.
- 26 Ha mae betsa betsapa anu hiweabu minabuki dakei
meshairakubainimaburā,
ha yurabu mī atxia hawa kushipa hayama ikimabuki,
bai anua basi keska ina awā piti basi nāketapa keska inū
basi betsa ha hiwe wakī shewamisbu hukuīma bari huaikiria
niwe shūku ibirākī tsusī wāmis keskarā.
- 27 Hanira mī kamis inū hawara aki mī nimis ē unaiī.
Mī eki sinatai pubēhairaima ē unāriaii.
- 28 Iubis kēkī mī hatu txakabuwakī itxakawakubaīmisri
ē unāriaii.
Haskawē taeshū ina awa pubē amisbu keska wakī
mia depestā ē mia mane deuamashanaii,
mī keshari mia shewesheriakinā.

Mia haska watā ha baiwē mī huimawēri ana hawēri mī mae anu ē
mia nitxīshanai”,
akī Senhor Deusū hātxa keyuaya

29 hanushū Isaíasī shanē ibuhaira Ezequias yuikī:

“Haska wakī Senhor Deusū matu merabewashanai hawē unāmati
Senhor Deusū mia unāmaikiki.

Na habia ano inū ua ano ha katxu huaiki
shekiwā trigo ibubis hukūtā bimiyatā kaniai
tsekashū mā piyukubaīshanaii.

Hakia ano dabe inū besti taeaitiā
hanu ibubis mā bana hukuī bimitā kaniai tsekashū
mā pikubaīshanaii.

Ha inū, uva banatā hawē bimi tsekātā
mā pikubaīshanai.

30 Judá enabu habu debuama itxapa hiweriabu

mibā hawē tatxa txaipatā bimiai keskai
hatū mae sheni anu manishū pe hiwekī
ana bake itxapa wakubaīshākanikiki.

31 Mati Sião anu habu mawama ikimabu hiweriabu

hatiri Jerusalém anu bashikui hiweimabuwē taea
Senhor Deus kushipa dasibi binu keyuatū hatu mekekubaīshanikiki,
hawē nui paewenā”, atā

32 hanua betsarā, “Assíria nawa shanē ibuhairakiri eska wakatsi

Senhor Deusū yuikiki:

‘Jerusalém anu bebia hikiama ishākanikiki.

Jerusalém uke merā hawa pia betsa bishkuama ishākanikiki.

Atxikī txakabuwanū ika

hawē pia nemati hawa betsā tsumatā hawē yura huneama
ishākanikiki.

Hanu hikibaī hatu tsakakatsi hawē mishki kenebaunibu dapi
mai mātxikī maspuama ishākanikiki.

33-34 Ē tsuma pepa shanē ibuhaira Davi inū haska ibubis ē yubakamis
shinākī

na maewā ē mekekubaīshanaiwē taea

habias baiwē tsakanametanū ika beimabu

ana hawēri hawenabube Assíria nawa shanē ibuhaira

txītūbaīshākanikiki,

Jerusalém anu hikiamarā.

Ē Senhor Deusū eska ē mia yuiiai’ ”, aka

nīkatā Isaíasī shanē ibu Ezequias yuinikiaki.

³⁵Habias meshu merã Assíria nawabū hatū tari hiwe pūtebaunimabu anu Senhor Deusū nai tsuma debuwanika bututã kauãkĩ 185.000 detenamenikabu hatu tenã keyubaini kakē penamahaira habu hiweabu ma bestēbaū mirimahaira mawabu uībaunaibuwē ³⁶taea datei Assíria nawa shanē ibuhaira Senaqueribē hatū tari hiwe hatu pewamatã hawenabu dasibibube Judá enabū mai pakea anua kaībaini bui maewã hanushū shanē ibuhairabū hatu yunumis anu hawē maewã Nínive anu txītūbaini hari hikinibukiaki. ³⁷Hanua shaba betsatiã hawē mekenika yshibu Nisroque kēwāti hiwe anu Senaqueribē kēwaī ka hawē huni bake dabe Adrameleque inū Sarezzer hikishū hatū epa txatxi txatxi akĩ tenãtã pashai mai pakea hawē kena Ararate anu hunei buimabū shanē ibuhaira Senaqueribē shātukū hawē huni bake betsa Esar-Hadom shanē ibuhairanikiaki.

Josias Judá enabu shanē ibuhaira inikiaki, na hãtxarã
(2 Cr 33.24–34.2)

21 ²³Josiasĩ epa shanē ibuhaira Amom tenanū itã hawē merabewanika shanē ibu beshmasbu haki yubakatã shanē ibū hiwe hawērua meranushū Amom tenãbū ²⁴yurã kaianē hatū shanē ibu tenãbu nĩkatã habū akãshu atxitã haburi kupikĩ tenãtã hanushū hau hatū shanē ibuhaira ikūkainū Amomnē huni bake Josias katunibukiaki.

²⁵Judá enabu shanē ibuhairabu ikubainaibukiri una betsa merã hatuki kenemisbu hawē daya betsa betsapa Amom hiweshū akubainikiri hakiri kenenibu hayaki. ²⁶Mibã bana anu hawē kena Uzã anu Amom mawa maiwanibukiaki. Hanua Amom shātukū hawē huni bake Josias Judá enabu shanē ibuhaira inikiaki.

22 ¹Josias 8 anobia shanē ibui taeni 31 ano Jerusalém anushū hatu yunui shanē ibuhairakūkainikiaki. Hawē ewa Bozcate anua kaini hawē kenarã, Jedida inikiaki, Adaíasĩ bakerã. ²Haska hawē shenipabu Davi pe hiwekūkaini keskai hatū txibãkĩ hawa shinã betsa betsapa wama Josias hawa hiwe txakama pe dayakūkainai Senhor Deusū haska betxipaiai ashuaĩ uĩ hawē benimakūkainikiaki.

Senhor Deusū hãtxa Moisi unaki keneni arunibu atimas
betxinibukiaki, na hãtxarã
(2 Cr 34.8-33)

³Josias shanē ibuhairani ma 18 ano kaya hanushū shaba tibi ikai hatū keneshūmis Safã kenashū Senhor Deus kēwāti hiwe anu yununikiaki. Safãnē eparã, Azalias inikiaki. Hawē hutxirã, Mesulão inikiaki. Josiasĩ Safã yunukĩ yuikĩ:

4—Nukunabu Deusbe hãtxashunika shanē ibu Hilquias anu kashū uītãwē. Eska ē hãtxa ea yuishūtãwē: “Senhor Deus kēwāti hiwe habū beputi tibi mekeshū yurabū pei hatu inãkuiaĩbu itxawamisbu hau haki

dasiwanūbūwē. ⁵ Senhor Deus kēwāti hiwe hau pewakī benawamanūbū Senhor Deus kēwāti hiwe habū pewaibu ha pei hatu ināwē, dayarubu ha peiwē hau hatu pakanūbunā. Habū dayaru pepa benabaūkī katsushū hau habū hawē dayaruburi pakakubaīshanūbūwē. ⁶ Hawē kēwāti hiwe hau hawē pewanū, iwanā, mishki datsa bishanaibu inū hi nisa bishanaibu hatu pakakī hanushū habu dayaibu yununikabu inū, hi dayanika habū Templo pewaibu hatu pakakubaītirubuki. ⁷ Huni pepa hawa yumetsuisbumawē taeshū hawē kēwāti hiwe mekenikabu peikiri hau hatu unāti wakī yukayamashanū Hilquias ea yuishūriatāwē— aka Safā kashū hawē shanē ibū hātxa Hilquias yuia

⁸ hanushū hawenabu Deusbe hātshashunika shanē ibū Hilquiasī Safā yuikī:

— Senhor Deus kēwāti hiwe anu hawē yunuti inū hawē nemati hātxa Senhor Deusū Moisés yuia una merā kenenī ē betxishinaki. Butāwē— akī inā Safānē mebībaini kashū ha una uī keyutā ⁹ txipu hawē shanē ibū yuinū, iwanā, Safā kashū yuikī:

— Senhor Deus kēwāti hiwe anua pei betxikī itxawatā hau pewanūbū hawē kēwāti hiwe mekenikabu mī dayarubu Deusbe hātshashunikabū pei hatu inākāshuki— iwanā,

¹⁰— Ha dikabi nukunabu Deusbe hātshashunika Hilquiasī ea una ināshuki— atā shanē ibuhaira Josias ha una Safānē yui keyushuna ¹¹ hawē yunuti inū hawē nemati Moisi kenenī hātxa nīkatā datekī shanē ibuhaira Josiasī hawē tari ushnitā ¹² Hilquias inū, Safānē huni bake Aicāo inū, Micaíasī huni bake Acbor inū, kenekubaīmis Safā inū, hawē merabewanika Asaías hatu kenakī itxawashū hawaira hatu yunukī ¹³ yuikī:

— Haska hawē yunuti inū hawē nemati na una merā kenenī ē nīkashukiri bushū eakiri inū, na Jerusalém anu hiweabu inū, Judá enabū mai pakea anu hiweabu dasibi Senhor Deus nukukiri yukashūtākāwē. Na una merā Moisi kenenī nukū shenipabū hawa nīkabuma inū hawa txibākī akama inibuwē taea Senhor Deus nukuki sinatahairaimēkainā— hatu wa

¹⁴ Deusbe hawenabu hātshashunika Hilquias inū, Aicāo inū, Acbor inū, Safā inū, Asaíasī yukai bui Deusū hātxa yuishunika aibu hawē kena Hulda anu bunibukiaki. Hawē benē kenarā, Salum inikiaki. Hawē eparā, Ticva inikiaki. Hawē hutxirā, Harás inikiaki. Salumnē Senhor Deus kēwāti hiwe anushū Deusbe hawenabu hātshashunikabū hatū tari mekekubaīmistū Jerusalém maewā bekesh betsa bena anu Hulda hiwea anu hikishū haska shanē ibū Josiasī hatu yunua yuiabu ¹⁵⁻¹⁶ Deusū hātxa hatu yuishūkī Huldā hatu yuikī:

— Israelī enabu mekenika Senhor Deusū kemati hātxa nīkakāwē: “Txanima haska mā ea yukayushurā, hau mā ea yukayunū hatū matu yunushu ē hātxa eska yuiritākāwē. Haska txanima ē yuini hawē kupiti ishanai unaki kenenibu Judá enabu shanē ibū yuishu keska wakī ē matu

ashanaii, na mae anu yurabu hiweabu kupikĩ txakabuhaira wakinã, haska ẽ txanini yuikĩ nĩkashu keskarã. ¹⁷Matũ shenipabũ ea henetã yushibu betsa betsapabu kẽwãkĩ hatu bebũshũ sheni ininipa kuashũkĩ ea sinatamahairanibuki. Haskawẽ taea na maeki ẽ sinatahairani ibubisi haskatã ẽ hawa daetirumahairaki. ¹⁸⁻²⁰Ha inũ, hau mã Senhor Deus yukai benũbũ Judã enabu shanẽ ibuhairatũ matu yunushu eska hãtxa yuitãkãwẽ. Israelĩ enabu mekenika Senhor Deusũ mia yuiriakĩ: Ẽ hãtxa kenenibu una anua Safãnẽ mia yuishuna nĩka pehaira watã mã shinã datei mã eki mesebiayarã, haska watã ha ẽ hatu yupunĩ txakabuwakĩ ẽ keyushanaii, na mae inũ nenu hiweriabu ha una kenenibu anua ẽ hatukiri ha iniwenã. Haska shinaĩ mã saki saki ikĩ mã shinã betsa watã ẽ shinã txibãkĩ mã ea ikũwai ẽ ma mia nĩkashuki. Mã tari mã ushnitã ea bebũ nia huĩti nishma mã kashahairaya ẽ miwẽ nuiai ẽ mia yuiiai. Haskawẽ taea kupikĩ na mae txakabuwakĩ ẽ hatu itxakawashanai mã uĩriama unanuma mã mawashanaii, mã shenipabuki nukuirã. Ẽ Senhor Deusũ txanima ẽ mia yuiiai”— ikai Huldane nĩkatã hatu yuia hanua habũ shanẽ ibuhairatũ hatu nitxiã beabu hanua txĩtũbaĩ Senhor Deusũ kemati hãtxa Josias yuinibukiaki.

23 ¹Hanushũ hau dasibi habe itxai benũbũ Judã enabũ mai pakea anua mae tibi inũ Jerusalém anua anibu unanepabu hau hatuki txanitanũbũ shanẽ ibuhaira Josiasĩ hatu kena bea ma haki itxabu ²Judã enabu hunibu dasibi inũ, Jerusalém anu hiweabu inũ, hawenabu Deusbe hãtxashunikabu inũ, Deusũ hãtxa yuishunikabu inũ, mae hirabi bake mishtĩbu inũ, yura ewabu betsa shanẽ ibubu inũ, betsa nuitapaibu dasibi Senhor Deus kẽwãti hiwe hemaĩtĩ anu shanẽ ibuhaira Josiasbe bua mapuabu Senhor Deus hatũ shenipabube yubakani hãtxa una merã kenenibu Senhor Deus kẽwãti hiwe anua betxishinabu bua Josias tsaushũ ha una meranu hãtxa dasibi hui kushipawẽ hatu yuishũkĩ keyutã ³shanẽ ibuhaira benikaũ Senhor Deus kẽwãti hiwe utati mane txibu dapi nishũ dasibibũ nĩkaibũ Senhor Deus yubakĩ yuikĩ: “Eanã, hawẽ yubakani hãtxa Moisi unaki keneeni dasibi hawara Senhor Deusũ betxipaii ẽ akubainaii, hawa kanekĩ betsa wama heneama hawẽ yunuti inũ hawẽ nemati inũ haska pe hiwekĩ yusiti hãtxa nĩkakĩ txibãkinã. Txanimahaira eã ẽ akubaĩshanaii”, ikaya yura dasibibũ nĩkatã:

“Mã haska hãtxakĩ yuiayarã, nukubunã, nũ mibetã habiaskari txibãkubaĩshanaii”, iki hãtxanibukiaki.

**Josiasĩ Deus kayabi kẽwãti hiwe Templo hatu
pewashũkubainikiaki, na hãtxarã
(2 Cr 34.3-7)**

⁴Hanushũ Senhor Deus kẽwãti hiwe hemaĩtĩ anua yushibu Baal inũ Poste-ídolo inũ bishi shukua tibi ha kẽwãti dami wanibu bikĩ keyushũ

hau putanübū hawenabu Deusbe hātxashunika shanē ibu Hilquias inū, hawenabu Deusbe hātxashunika shanē ibu ha katxu inū, hikiti shui mekenikabu habu shanē ibuhaira Josiasī hatu yunua hawē hātxa txibākī Senhor Deus kēwāti hiwe hemaītī anua yushibu kēwāti dami sharabu Jerusalém anua kaīmabaikī benāta bushū Cedrom napaku anu hanus mātxītā kuashū txipu hawē mapu beabaī Betel anu bunibukiaki. ⁵Hanushū shanē ibuhaira Josiasī hatu yunukubainaya mati meribi keyatapa Jerusalém kesukauna anushū inū Judá enabū mai pakea mae betsa betsapa dapi mati meribi keyatapa hanushū Deus kēwākī ashūkī pewama hau habū sheni ininipa menukī kuashūkubaīshanübū hatunabu Deusbe hātxashunikabu Judá enabu shanē ibu betsabū hatu katushū daya hatu inānibu hatu nitxikī dasibi putakī hanushū yushibu Baal inū, bari inū, ushe inū, bishi shukua tibi ha kēwāti tibi daewakī sheni ininipa kuashuni yushibubube hātxashunikabu putariakī ⁶hi dami keyatapa yushibu dami aibu washū Senhor Deus kēwāti hiwe hemaītī anu nitxinibu betsesū Jerusalém anua benāta bushū Cedrom napaku anushū kuakī keyutā nuitapaibu mawa hanus hatu maiwamisbu anu hawē mapu sa akī keyushū ⁷ha dikabi Senhor Deus kēwāti hiwe hemaītī anushū yushibu kēwaī huni betsa puī kinī txutamisbu inū hawē yura hirabi yabukuti yushibu kēwāti tari wakī aibuaibū timashūmisbū hiwe tibi dasibi berākī di ashū hawē ture sharabu benāta mātxīshū kuakī keyunibukiaki.

⁸Hanushū Judá enabū mai pakea hirabi mae tibi anua maewā Geba norte haira anua inū maewā betsa Berseba sulkirihaira ha habu hawenabu Deusbe hātxashuni peisbuma hau Jerusalém anu benübū shanē ibuhaira Josiasī hatu yunua bei keyuabū hanushū Senhor Deus kēwākī sheni ininipa hawenabu Deusbe hātxashunikabū menushūkubaīmisbu hau txakabuwakī yamawatanübū hawē tsumabu Josiasī hatu yunua, bukubaūkī haska hatu yunushina hawē tsumabū akaibū, Jerusalém hirabi mekenika shanē ibu beshmas Josuénē hiwe dapi hawē mae hikiti shui yusmauri yushibu txakabu hawē kēwāti txi tapu hau derakī di akī keyunübū hawē tsuma betsabu Josiasī hatu yunua haska hatu yunua akaibū ⁹hakia mati keyatapa meribi anushū sheni ininipa habū kuashūkubaīmisbu hawenabu Deusbe hātxashunikabu betsabube Senhor Deus kēwāti hiwe Jerusalém anu hau ana dayayamanübū hatu nemaimashū hatubetā besti misi shasha watiuma pikubainibukiaki.

¹⁰Yushibu Moloque daewakī kēwākī hatū bakebu huni inū aibu hiwea hatu kuashūkubaīmisbu hau ana kuakī menupakeyamashanübū Hinom napaku anushū hanushū menuki Tofete hau txakabuwakī yamawakī keyunübū Josiasī hatu yunuria haska hatu yunua hawaira akī keyuaibū ¹¹Judá enabu shanē ibuhairabū bari kēwākī cavalo meribi washūkubainibu Senhor Deus kēwāti hiwe hemaītī shui dapi hanu Natā-

Melequẽ cavalo hawẽ hiwe anushũ hatu mekeshũmis ha cavalo hatu tenãmakĩ keyushũ hanushũ hawẽ bari kẽwãti cavalõ tarãbaĩti Josiasĩ hatu kuamakĩ keyumatã ¹²ha dikabi Acazĩ hiwe masapa anu Judá enabu shanẽ ibuhaira betsa betsapabũ hawẽ kẽwãti txi tapu akubainibu inũ Senhor Deus kẽwãti hiwe hemaĩti anu hawẽ hutxi Manassésĩ ani derakĩ di ashũ teke teke akĩ pure pure ashũ pashku Cedrom namaki hau putanũbũ Josiasĩ hawẽ tsuma hatu yunua, haska hatu yunua putakĩ keyuaibũ

¹³Sidom nawabũ mekenika yushibu deus kayabima Astarote aĩbu dami kẽwãti hiwe inũ, Moabe nawabũ mekenika yushibu deus kayabima Quemos dami kẽwãti hiwe inũ, Amom nawabũ mekenika yushibu deus kayabima Milcom dami kẽwãti hiwe Judá enabũ habũ danãhairabiaibũ Jerusalém bari huaikiri Mati Masite sulkiri matxi buteauri anushũ hau hatu amanũbũ Israelĩ enabu shanẽ ibuhaira Salomãonẽ dayakapabu hatu yunua akea akenibu ha kẽwãti hiwe tibi hau yamawanũbũ Josiasĩ hatu yunua dera dera akĩ keyunibukiaki. ¹⁴Ha dikabi ha hiwe wanibu txakabuwaibu anu ana hiwe betsa benikĩ hau ayamashanũbũ yushibu hi dami keyatapa inũ mishki dami betsa betsapa hi kẽwãti txibu nitxinibu hau teke teke akĩ txuri wanũbũ shanẽ ibuhaira Josiasĩ hatu yunua akĩ keyutã hau hawẽ shãtu anu yura mawanibũ shau hau hanuri anũbũ hatu yunuria ariaibũ ¹⁵habiaskari mae betsa Betel anushũ kẽwãti betsa deus kayabima meribi wakĩ Nebatẽ huni bake shanẽ ibu Jeroboãonẽ yushibu betsa kẽwãti txi tapu washũ sheni inĩti kuakĩ hawenabu Israelĩ enabu txakabuwamakubaini ha txi tapu di akĩ keyutã mishpu watã txiwẽ menutã ha dikabi yushibu dami washũ nitxinibu di akĩ keyuriatã hau kuanũbũ Josiasĩ hatu yunuima akaibũ

¹⁶ana Josias txitũkaĩ uĩbaũkĩ Betel mati anu yura mawa hanu hawẽ shau arumisbu mishki shui betsa betsapa betxitã shau dasibi bishũ Jeroboãonẽ txi tapu wani anushũ ha shau menukĩ keyukĩ hatu txakabuwamakĩ hau atimapa wanũbũ Josiasĩ hatu yunuria dasibi Betel anushũ hatu yunua akĩ keyunibukiaki.

Haska bebũkiri Deusũ hãtxa yuishunika txanini Josiasĩ ha kene betximabu uĩmashũ Deusũ yuini Josiasĩ menekĩ keyutã ¹⁷hatu haska wamakĩ hatu yukakĩ:

—U unurã, ha shinãmati mishki hiwe pishta wanibu ẽ uiainã, hawamẽ?— hatu wa

mae Betel anu hiweabu hunibũ kemakĩ yuikĩ:

—Deusũ hãtxa yuishunika Judá enabũ mai pakea anua hushũ haska na txi tapukiri bebũkiri hakiri txanini keska Betel anua mĩ yamawakĩ ashurã, ha mawa maiwanibu hawẽ shau arunibu ikikiki— akabu

¹⁸Josiasĩ nĩkatã hatu yuikĩ:

—Habiaska henekãwẽ. Hau tsuã taska hawẽ shau meyamashanũbunã— ikaya

haskawē taeshū hawē shau inū Samaria anua Deusū hātxa yuishunikã shauri hawa meabuma inibukiaki.

¹⁹⁻²⁰ Samaria anushū Senhor Deus sinatamahairakī mati keyatapa anushū hatū yushibu kēwāti hiwe tibi Israelī enabu shanē ibuhaira betsa betsapabū akubainibu anushū yushibubube hawenabu hātshashunikabu hatū txi tapu anushū hau tenanūbū Josiasī hatu yunua hatu tenākī keyuabu yushibu kēwāti txi tapu anushū mawabū shau hau kuakī keyunūbū Josiasī hatu yunuriakubainaya haska hatu yunua akubainaibū haska Betel anushū ashīã keskari wakī yushibu kēwāti hiwe tibi Samaria anua Josiasī yamawakī keyutã hanua Jerusalém anu ana txītūkainikiaki.

Josiasī shinābaū Páscoa hatu besimanikiaki, na hātsharã
(2 Cr 35.1-19)

²¹⁻²³ Hanushū shanē ibuhaira Josiasī hawenabu dasibi hatu yunukī: “Senhor Deus nukunabube yubakai hātshai Moisi keneni hātsha una meranua nū nīkaima keska txibākī Egito nawabu Senhor Deusū nai tsumã hatū huni bake iyuabu tenã keyukī nukū shenipabū bakebu dūkebaini shināmati Páscoarã, ha shinākī dasibi pewatã Senhor Deus duawakī kēwai nū habe besishanaii”, hatu wairã, Josias shanē ibukūkaini ma 18 ano kaikī hatu anikiaki. Jerusalém anushū Senhor Deusū nai tsumã hatū shenipabū huni bake iyuabu tenãma hatu dūkebaini shināmati Páscoawē taeshū Senhor Deus kēhairawai benimai besinibukiaki. Na dasi shanē ibu unanepa yununikabubia habutiã hawa Páscoa besiana ikubainibu inū Israel inū Judá shanē ibui pashkarabeaibutiã haska besi henenibu Josiasī hawē shinã benawē Páscoa besi hatu amakī hawēruahaira wakī hatu taewamanikiaki.

Senhor Deusū hātsha Josiasī pe txibākī heneama inikiaki, na hātsharã

²⁴ Senhor Deus kēwāti hiwe anushū hawenabu Deusbe hātshashunika shanē ibu Hilquiasī Senhor Deus hatube yubakai hātshani unaki kenenibu betximawē taeshū hanushū hawē yunuti inū, hawē nemati inū, hawē pe hiweti yusiti hātsha uikī txibākubaikī Josiasī ashūkī Jerusalém anuabu inū Judá mai pakea anu hiweabu huni inū aibu mukayabu inū, yushibubu yukakī unāmisbu inū, hatū hiwe anushū hamapai dami mishtī kēwāmisbu tibi betxitã hatu mebitã hatu txakabuwākī yamawakī keyukubaikī ²⁵ Senhor Deusū hātsha haska Moisi unaki keneni txanima nīkakī hawē shinã dasibiwē inū, hawē yushī dasibiwē inū, hawē kushipa dasibiwē Josiasī ikūwākī hawē hiweakiri shinã betsa watã shanē ibuhaira, uatiã inibu inū hatiã ha bebū ishanaibu Josias pepa keska tsua betsa hayama inibukiaki, hatu binuarã.

²⁶ Josias haskabiakūkainaya hawē hutxi shanē ibuhaira Manassésī txakabuhaira wakubainiwē taea Judá enabuki Senhor Deus sinatākūkaini Judá enabuki sinatani heneama hawa daeama ikūkainaiwē taeshū

²⁷ Senhor Deusū yuikī: “Haska Samaria anushū hatu yunuaibu Israelī

enabũ nĩkakĩ ea txibākubainabuma ẽ henebaini keska wakĩ Judá enaburi putakĩ ẽ hatu danãshanaii, ana hawa hatu nemashunamarã. Ha maewã Jerusalém ẽ katubiani ẽ danãshanaii, ana mekeamarã. Hawẽ kẽwãti hiwekiri: ‘È kena hayakũkaĩshanikiki’, akĩ ẽ yuibiani ha dikabi ẽ mebĩshanaii”, iwanã, yuinikiaki.

Haskai Josias mawanikiaki, na hãtxarã
(2 Cr 35.20-27)

28-30 Josias shanẽ ibuhaira hiweyukẽ Assíria nawa shanẽ ibuhaira merabewanũ ika Egito nawa shanẽ ibuhaira Faraó-Neco Hene Eufrateskiri hawẽ detenamenikabube kai shanẽ ibuhaira Josiasĩ hawẽ detenamenikabubetã nemanũ ika kai Megido anu hatuki nukua hatube detenameibũ Faraó-Necõ Josias betxitã detekĩ tenãbainaya, hanushũ Josiasĩ shanẽ ibu beshmasbũ hawẽ yura cavalõ tarãbaĩtiki nanetã Megidokiria Jerusalém anu bushũ hanushũ maiwakĩ mishki shui anu hawẽ yura datanibukiaki. Hanushũ Josiasĩ huni bake Joacaz yurabũ katushũ hawẽ epã shãtukũ shanẽ ibuhaira wakĩ Joacaz katunibukiaki.

Judá enabu shanẽ ibuhairabu ikaibukiri una betsa merã hatuki kenemisbu hawẽ daya betsa betsapa Josias hiweshũ akubainikiri hakiri kenenibu hayaki.

Joacaz Judá enabu shanẽ ibuhaira inikiaki, na hãtxarã
(2 Cr 36.1-4)

31 Joacaz 23 ano haya Jerusalém anu shanẽ ibuima 3 ushe besti hatũ shanẽ ibuhaira inikiaki. Hawẽ ewa Hamutal inikiaki, Jeremiasĩ bake aĩbu Libna anua kainirã. 32 Hacia hawẽ shenipabũ apaunibu keska txibākĩ Joacazĩ yunutzakakĩ txakabuwarianikiaki, haska Senhor Deusũ betxipaiamahaira akinã.

33 Egito shanẽ ibuhaira Faraó-Neco txĩtũkirãkĩ Jerusalém anu hau Joacaz ana hanu shanẽ ibuyamanũ atxitã mai pakea Hamate anu mae betsa Ribla anu Joacaz hatu bitximatã hatu mekematã hanushũ hau hawenabũ hatũ mae anushũ hatũ imposto hau pakakubainũbũ hatu yunutzakayamakĩ 100 talento prata mane, 3,300 quilo pratarã, inũ 1 talento ouro mane tashipa, 33 quilo ourorã, hau pakanũbũ Judá enabu dasibibu kushipawẽ Faraó-Necõ hatu yunuhairatã 34 hanushũ Josiasĩ huni bake betsa Eliaquim katushũ hawẽ epã shãtukũ Judá enabũ shanẽ ibu watã hawẽ kena betsa wakĩ: “Jeoquim” watã henebaĩkĩ Egito anu Joacaz iyuima txipu haria Joacaz mawanikiaki.

35 Faraó-Necõ hatu yuka txakayamaimawẽ taeshũ hawara huni tibi hayabu shanẽ ibu beshmasbũ tanashũ habu itxapa hayabu itxapa hatu yukakĩ habu eskarabes hayabu eskarabes hatu yukabu mane prata inũ mane ouro bishunũ, iwanã, hawenabu hati yuka inãbaũkĩ prata inũ ouro

bishū shanē ibu beshmasbu hatu inākubaunaibū shanē ibuhaira Jeaquim anu beabu Egito anu Faraó-Neco hau bushūtanūbū Jeaquimnē hatu yunua prata inū ouro imposto pakati bushū inākubainibukiaki.

Jeaquim Judá enabū shanē ibuhaira ikūkainikiaki, na hātcharā
(2 Cr 36.5-8)

³⁶Jeaquim 25 ano haya Jerusalém anu shanē ibuhairanishū 11 ano hatu yunukubainikiaki. Hawē ewā kena Zebida inikiaki, Pedafāsī bake aīburā, Ruma anua kainirā. ³⁷Hakia hawē shenipabū apaunibu keska txibākī Jeaquimnē yunuxtakakī txakabuwarianikiaki, haska Senhor Deusū betxipaiamahaira akinā.

24 ¹Jeaquim shanē ibuhairaitiā nawa betsa Babilônia shanē ibuhaira Nabucodonosor hushū Judá enabū mai pakea dasibi anu hawē detenamenikabubetā hatu detekī shanē ibu Jeaquim babu watā inū kaīmakē Nabucodonosorī yunuti hātxa Jeaquimnē nīkakubaikī 3 ano henekī hawē shinā betsa watā hawē yunuti hātxa ana txibākatsi ikama heneaya ²haskashanaibukiri Deusū tsumabu hawē hātxa yuīshunikabu hatu hātchamakī haska washanai Senhor Deusū bebūkiri hatu banabimaniwē taeshū Judá enabū mai pakea itxakawakī txakabuwakubainūbū Caldéiau nawa yumetsubu inū, Síria nawa yumetsubu inū, Moabe nawa yumetsubu inū, Amom nawa yumetsubu shanē ibuhaira Jeaquim anu Senhor Deusū hatu yunukubainaya ³⁻⁴huniibu hawa txakabu hayamabiakē Jerusalém anushū shanē ibuhaira Manassésī hamē hatu detekī mirima tenākubaikī Senhor Deus danākī txakabu betsa betsapa akubainiwē taeshū hawē berubi Senhor Deusū hatu putakī nitxīkatsis ikaiwē taeshū Judá enabu itxakawakī yumetsukubainaibū hatiā hatū txakabu Senhor Deusū ana hatu buashūkatsi ikama inikiaki.

⁵Judá enabu shanē ibuhairabu ikubainaibukiri una betsa merā hatu kenemisbu hawē daya betsa betsapa Jeaquim hiweshū akubainikiri hakiri kenenibu hayaki. ⁶Jeaquim mawa maiwabu hawē epā shātukū Jeaquimnē huni bake Joaquim Judá enabu shanē ibuhaira taeaya

⁷Hene Eufrates anushū Egito nawa detenamenikabu maemakī taewakī hanira hatū mai pakea Egito shanē ibuhairatū hatu atxinibu Babilônia shanē ibuhairatūri ana hatu mebīkī atxibirākī Egito mai pakea kesha anu pashku napaku hawē kena Egito pashku anu atxīkī Babilônia shanē ibuhairatū heneimawē taea mai pakea betsa ana hawē shanē ibu hayamawē taea Egito nawa shanē ibuhaira ana hawē mae anua tashniama ikūkainikiaki.

Shanē ibuhaira Joaquim inū hawē shanē ibu beshmasbube Babilônia
anu hatu iyunibukiaki, na hātcharā
(2 Cr 36.9-10)

⁸Joaquim ma 18 ano haya shanē ibuhairai taeshīshū Jerusalém anu hatu yunui ushe dabe inū besti hatū shanē ibu inikiaki. Hawē ewā kena

Neústa inikiaki, Elnatã aĩbu bakerã, Jerusalém anua kainirã. ⁹Hakia hawē shenipabū apaunibu keska txibākĩ Joaquimnē yunutzakakĩ txakabuwarianikiaki, haska Senhor Deusū betxipaiamahaira akinã.

¹⁰⁻¹² Joaquim shanē ibuaițiã Nabucodonosor Babilônia shanē ibuhairakĩ hatu yunukubaini ma 8 ano kaĩkĩ Nabucodonosorĩ detenamenikabu itxapabu hau Jerusalém atxinübū hatu yunua beshĩshū Jerusalém kebauni nati itã atxi taewakĩ pia bishku bishku akĩ mashash tũku puta puta akĩ hashi urē urē akĩ hatū mae mishki kenebaunibuki mai mātĩkĩ taewaibū hatū shanē ibuhaira Nabucodonosor hui hatuki nukutushiaya Joaquimnē hawa hatu maematiruma unaĩwē taea Judá enabu shanē ibuhaira Joaquim inū, hawē ewa inū, hawē dayaru shanē ibu beshmasbu inū, hawenabu shanē ibu beshmasbu inū, huni unanepabu hatube hune hãtxamisbu Jerusalém anua tashnibaini Babilônia shanē ibuhaira bebū mapuabū hau hatu atxinübū hawē detenamenikabu yunua hatu atxishū hawa hatu itxakawakĩ meama mekekubainibū

¹³ Jerusalém merã hikishū Senhor Deus kēwãti hiwe anushū pei heshe inū mabu karuhaira dasibi bishū shanē ibuhairatū hiwe anuari hikishū pei heshe inū mabu karuhaira dasibi biriashū Senhor Deusū kēwãti hiwe hawēruahaira wakĩ shanē ibuhaira Salomãonē hatu yunua ourowē hiwe uke merã dasibi napushbaunibu inū hawē kēwãti mabu dasibi hatu bepesh keyumani hau babekĩ keyunübū shanē ibu Nabucodonosorĩ hatu yunua hana hikishū ouro dasibi babe babe akĩ keyushū hatū shanē ibuhaira inãnibukiaki, haska Senhor Deusū bebũkiri hatu yuini keska wakinã. ¹⁴⁻¹⁶ Jerusalém anua hatu atxikãshu hau Babilônia anu hatu iyunübū hawē detenamenikabu Joaquim inū, hawē ewa inū, hawē aĩbuaibu inū, hawē shanē ibu beshmasbu habū mae yunumisbu dasibi Nabucodonosor hatu yunua hatu iyuaibū,

txipu ha katxu Jerusalém anu hiweabu mirima yurabu shanē ibubu dasibi inū, detenamenika pepabu inū, mabu wanikabu dasibi inū, mane dayamisbu dasibi hatu atxikĩ itxawashū 10.000 tana keyushū 7.000 shanē ibu beshmasbu inū 1.000 mabu wanikabu inū, mane dayamisbu ha dikabi huni kushipabu detenameti tapĩtirubu Babilônia anu hau hatu iyunübū Nabucodonosorĩ hatu yunua hatu iyuaibū yurabu habu hawauma nuitapahairairibu besti hatu henebainibukiaki. ¹⁷Hanushū hawē hutxĩ betsã bake mashku Matanias Babilônia shanē ibuhaira Nabucodonosorĩ katushū Judá enabū mai pakea shanē ibuhaira watã hawē kena betsa wakĩ kenakĩ: “Zedequiaski”, atã hanua hawē mae anu kanikiaki.

Zedequias shanē ibuhaira inikiaki, na hãtxarã
(2 Cr 36.11-16; Jr 52.1-3)

¹⁸Zedequias 21 ano haya shanē ibuhairai taeima Jerusalém anu 11 ano hatū shanē ibu inikiaki. Hawē ewã kena Hamutal inikiaki, Jeremiasĩ aĩbu

bakerã, Libna anua kainirã. ¹⁹Hakia hawẽ betsa Joaquiunnẽ akubaini keska Zedequiasĩ txakabuwariakubainaya Senhor Deusũ betxipaiama ²⁰hatuki sinatakĩ Jerusalém inũ Judá enabũ mai pakea anua mekekĩ Senhor Deusũ ana habukiri shinãma hatu putanikiaki.

Nabucodonosorĩ Jerusalém ana atxinikiaki, na hãtxarã

(Jr 39.1-7; 52.3-11)

25 Txipu ana Zedequiasĩ enabu pai itxakubaini: “Ë ana kushipaki”, ikĩ shinãyã Babilônia shanẽ ibuhaira Nabucodonosorĩ hatu itxakawani ha shinãkĩ hawẽ yunuti hãtxa dananikiaki. ¹Zedequias shanẽ ibuhairani ma shaba 10 inũ, ushe 10 inũ, 9 ano kainaitiã Jerusalém ana atxi keyukĩ yamawanũ ika Nabucodonosorĩ hawẽ detenamenikabu dasibi iwei Jerusalém anu kematã mae hirabi kebaũshũ benãta hatũ tari hiwe pũtebaunimashũ unãshubira hatu atxikubainũ, iwanã, mishki kenebaunibu anu mapuabu hatu detekĩ hatiritũ pia itxapa bishku bishku akubainaibũ ushe itxapa kaya hanu mapekebaĩ hatu tenãshanũ, iwanã, shaba tibi inũ meshu tibi mai bebirã bebirãki maewã mishki kenebaunibu anu mai damãtxĩbaũkĩ maspuwabaunaibũ ²⁻³ha maewã atxinũ ika haskabiranimabutã ma Zedequias shanẽ ibui shaba 9 inũ, ushe 4 inũ, 11 ano kainaitiã Jerusalém merã hawa ana piti hayama dasibibu buni pae tenehairai pikukubaini ma mawakatsis ikaibũ ⁴Caldéiau nawa detenamenikabũ hatu detekatsi ikĩ hatiritũ hatu keshebaunabũ hatiritũ mae mishki kenebaunibu anu hikinũ ishũ kini wakĩ shui watã hikiaibũ habiatiãri Zedequias inũ hawẽ detenamenikabu dasibi pashai kene dabe namakis anu shui betsa beputiya bepẽtã meshu merã shanẽ ibũ bai hanu hua pepa hawẽrua banamisbu baiwẽ Caldéiau nawabũ uĩbiaibũ hune hatu dũkebaini Hene Jordão napãpakiri bai kãwẽ kushibaini pashaibũ ⁵hakia Caldéiau nawabu detenamenikabũ shanẽ ibuhaira Zedequias hunei kai betxitã txibaĩ kushiriabaĩ Zedequiasĩ detenamenikabu dasibibũ hatũ shanẽ ibu hene keyubaini pashaibũ Jericó napãpa anu haki nukutã ⁶Caldéiau nawabũ Zedequias atxitã mai pakea Hamate anu mae betsa Ribla anu Babilônia shanẽ ibuhaira anu iyubu hanushũ hawẽ kupiti Nabucodonosorĩ Zedequias yuitã ⁷hanushũ Zedequiasĩ berubi hawẽ huni bakebu hau hatu tesẽ keyunũbũ Nabucodonosorĩ hatu yunua hatu tesẽ keyutã Zedequiasri hawẽ beru tsekashũ mane dispi txiwetameyawẽ meneshtã Babilônia anu hau iyunũbũ Nabucodonosorĩ hatu yunua Babilônia anu Zedequias iyushunibukiaki.

Senhor Deus kẽwãti hiwe mabu bitã hawẽ hiwe

kuanibukiaki, na hãtxarã

(2 Cr 36.17-21; Jr 39.8-10; 52.12-30)

⁸Nabucodonosor Babilônia shanẽ ibuhairakũkaini ha shaba 7 inũ, ushe 5 inũ, 19 ano kainaitiã Babilônia shanẽ ibu beshmas hatũ shanẽ

ibuhaira mekenikabu yununika hawē kena Nebuzaradā detenamenikabu itxapabube Jerusalém anu ana bei hikishū ⁹ Senhor Deus kēwāti hiwe inū, shanē ibuhairatū hiwe hawērua inū, dasibi yununikabū hiwe ewapa hawērua tibi txiwē kuakī keyutā ¹⁰ hanushū detenamenikabū Jerusalém mishki kenebaunibu txakabuwai dayahairakī atimas berākī keyuaibū ¹¹ Jerusalém anu habu nuitapai bashikuimabu inū, habū Babilônia shanē ibuhairatū yunua txibaibu inū, mabu wanikabu tesheimabu Nebuzaradānē hatu itxawashū Babilônia anu hau hatu iyunūbū hawē detenamenikabu itxapabu yunua dispiwē hatu neshā neshā akī keyushū Babilônia anu maī hatu iyuaibū ¹² hau habū hanushū uva nishi bai inū yunu bai hau dayakī takushkubaīshanūbū nuitapahairaibu besti Judá mai pakea anu Nebuzaradānē hatu bashitā

¹³ hanushū Caldéiau nawabu detenamenikabū Senhor Deus kēwāti hiwe kuariama hawē mabu Babilônia anu bukatsi itxawashū hawē bronze txibu keyatapa dabe inū, hawē bronze ūpash aruti ewapahaira inū, haki aruti tsaunibu tekekī txuri watā ¹⁴ habiaskari wakī habu bukatsi haki mapu itxawamisbu inū, hatū pá inū, hawē bī yumē meshteti tsisura inū, beati ewapa inū, dasibi bronze mabu betsa betsapa Senhor Deus kēwāti hiwe anua bikī itxawakī keyuaibū ¹⁵ ha dikabi hatū shanē ibuhaira mekenikabu yununika Nebuzaradānē ouro mabu inū, prata mabu dasibi inū, haki inīti kuamisbu inū, kētxa betsa betsapa itxawatā Babilônia anu hatu bumanikiaki. ¹⁶ Ha Senhor Deus kēwāti hiwe txibu dabe inū, haki ūpash arukī meketi ewapa inū, haki ūpash maneshū tsaūti hau anūbū shanē ibuhaira Salomāonē hatu yunua anibu hawē shākama unākī tsuā tanakī binitiruma inikiaki. ¹⁷ Hanua ha mane bronze txibu dabe hawē keyatapa 8 metro binua haya ha mamaki desua dabeki mane bronze maiti hawērua hatia masua mistunibu haya ha mane bronze maiti dabeki bimi mane bronze dami washū dūtanibukiaki, haska dabes wakinā.

Babilônia anu Judá enabu hatu iyukī keyunibukiaki, na hātxarā

¹⁸ Shanē ibuhaira mekenikabu yununika Nebuzaradānē hatūri hawē detenamenikabu yunukī Jerusalém anu yurabu bashikuimabu hatu itxawamakī hawenabu Deusbe hātxashunika shanē ibu Seraías inū, hawenabu Deusbe hātxashunika shanē ibu ha katxu Sofonias inū, Senhor Deus kēwāti hiwe hikiti shui beputi mekenikabu dabe inū besti inū, ¹⁹ detenamenikabu mekemis shanē ibu inū, Judá enabu shanē ibuhaira dayashūmisbu 5 bashikuimabu inū, hawē shanē ibu detenamenika washunū, iwanā, hatū hatu katumis shanē ibu beshmas inū, 70 hunibu dasibibū unaibu Jerusalém anu bashikuima hiweabu betxitā ²⁰⁻²¹ atxikī hatu itxawashū mai pakea Hamate anu mae betsa Ribla anushū Babilônia shanē ibuhaira manayuaya hanu Nebuzaradānē hatu iyushū hawē shanē ibuhaira bebū hatu nitxiā hau hatu detekī tenanūbū Babilônia

shanē ibuhairatū hatu yunua hawē detenamenikabū ha 82 hunibu tenā keyunibukiaki.

Haska wakī Judá enabu atxishū hawē mai pakea anua txaihaira hatu iyunibukiaki.

Habu bashikuimabu Egitu anu pashai keyunibukiaki, na hātcharā
(*Jr 40.7-10; 41.1-3, 16-18*)

²²Hatu haska wabaikī yurabu bashikuimabu hau hatu yunukubaishanū Safānē baba Aicāonē huni bake Gedalias katushū Babilōnia shanē ibuhaira Nabucodonosorī Judá shanē ibu mekenika watā hawē detenamenika dasibibu Babilōnia anu hatu iyumakē ²³Judá enabu detenamenikabu pashai huneimashū haskakiri banabitā tashnibirani Gedaliasbe hātchanū ika detenamenikabu shanē ibubu Netaniasī huni bake Ismael inū, Careā huni bake Joanā inū, mae Netofa anua Tanumetē huni bake Seraías inū, mae Maacá anua huni betsa hiwenitū huni bake Jazanias habū txibāmisbube Mispa anu buabu ²⁴Gedaliasī hatu yubakī yuikī: “Caldéiau nawabu shanē ibu beshmasbuki dateyamakubaikāwē. Nukū mai pakea anu bashikuima nenu hiweshū Babilōnia shanē ibuhairatū hātcha nīkakī txibākubaishākāwē. Haskai mā pei hiwekūkaishanaii”, hatu waima

²⁵hanua 7 ushe kaya Judá enabu shanē ibuhairatū enabu Elisamā baba Netaniasī huni bake Ismael 10 hunibube Mispa anu hikishū shanē ibu mekenika Gedalias inū, Judá enabu habe dayamisbu inū, Caldéiau nawabu habube hiweabu hatu detekī keyuabu ²⁶hatu haska wabu bana nīkabauni Caldéiau nawabuki datehairai hatū mabu pewakī keyutā mabu itxapayabu inū, mabu eskarabesyabu inū, detenamenikabu shanē ibubu pashai Egitu anu hiwei bunibukiaki.

Babilōnia bitxiti hiwe anua Joaquim tashnimashū hawē benimakī
duawanibukiaki, na hātcharā
(*Jr 52.31-34*)

²⁷Judá enabū mai pakea anua shanē ibu Joaquim iyunibu shaba 27 inū ushe 12 inū 37 ano kainaitiā Babilōnia anua shanē ibuhaira bena Evil-Merodaquē hatu yunukī taewai Joaquimwē nuikī bitxti hiwe anua tashnimashū ²⁸hawē nuikī duawakī Babilōnia anu shanē ibubu Nabucodonosorī hatu iwebirābirākī hatu itxawani Evil-Merodaquebe ha dapi tsaubaunabu anu Joaquim shanē ibū tsauti dapi habe ketashamekī betsa shekatā hatu binumakī ha dapihaira Joaquim tsaūtā ²⁹bitxiti hiwe anushū tari sawemis pekamatā hawē shanē ibū tari Joaquim ana sawemakī duawakī hatishū hiweaitiā hiwemashū shaba tibi shanē ibuhaira Evil-Merodaquebetā pimakubainikiaki. ³⁰Ha dikabi hanu hiweyukē pe hiwemakī shaba tibi Babilōnia shanē ibuhairatū duawakī hawē hamapai tibi inākubainikiaki.